

清 楊 儒 輯

(國學文庫第二十二編)

中 俄  
會 商

交收東三省電報

鈔 彙

全

中華民國二十四年十月 北平隆福寺街 文殿閣書莊印行

清 楊 儒 輯

(國學文庫第二十二編)

中 俄  
會 商

交 收 東 三 省 電 報

鈔 彙

全

中 華 民 國 二 十 四 年 十 月  
北 平 隆 福 寺 街  
文 殿 閣 書 莊 印 行

據寒天版印本  
(每行半葉十八字)  
重印

(實價國幣七角五分)

中俄會商交收東三省電報彙鈔目次

光緒二十六年分.....一

光緒二十七年分.....三三

庚子年夏秋季與東三省將軍往來電報.....九九

目次

56519

56519

校者例言

一此書原本題曰「中俄會商交收東三省全案彙存」，爲清光緒二十七年駐俄公使楊儒於俄都所編輯者。乃研究中俄問題，滿洲問題，最重要之史料。

一原本係用寒天版 *Heccograph* 印刷，當時所印，僅有數十部傳世，故頗罕貴。

一原本凡二卷，內容目次，計：(一)會商交收東三省約款情形疏；(二)與俄外戶部問答錄；(三)增阿暫章；(四)戶部口述條款；(五)外部初次原稿；(六)外部二次改稿；(七)往來電報彙鈔；(八)俄廷佈告罷議原文；(九)與東三省將軍往來電報等章。然近人王芸生所編之「六十年來中國與日本」一書，已將(一)(二)(三)(四)(五)(六)(七)(八)諸章，轉錄於卷四中。茲特將原本第七九兩章，重爲校訂，題名「中俄會商交收東三省電報彙鈔」，排印成書，以供治外交史者之研究。

一原本下卷卷末，有楊儒之光緒二十七年跋文一篇，殊爲重要。蓋可窺見楊氏編輯之由，與對於東三省問題之政見，足資參攷，今亦附載卷尾。

中俄會商交收東三省電報彙鈔

光緒二十六年分

電李傅相 閏八月二十八日

馬漾電計達鑒格使想已到京 儒來黑海迭晤外戶部彼均以修好了事  
爲急因告以東三省現爲俄據中外噴有煩言彼謂俄好意始終如一力  
之所及無不相助等語竊以現方開議和局擬向彼敦商先交還東三省  
各國當有觀感惟交地需人接收現三將軍爲誰總以明白曉事方可勝  
任祈速示以便商辦 儒勸

電李傅相 九月初一日

勸電計達索歸東三省事連日與外戶部籌商俾釋各國疑慮彼亦謂然



但云俄兵到盛京時民方縱火搶掠幸兵已抵城故宮殿御座書庫寶器均得保全陵寢亦派人看守無恙若驟撤兵恐亂復作因告以已電傅相催各將軍前赴接洽交收地方彼云如此不難商辦並可少畱巡兵聽將軍調用以資彈壓彼頗願見好意已允行惟保路之兵一時尙不允全撤乞代奏速復 備東

電李傅相 九月初九日

勘東到否議已開否久未奉電甚念俄東三省大軍業已漸次撤退交還地方已言明由俄統領逕與該處將軍斟酌情形辦理事機尙順外戶部須下旬回都 備來此兼旬旅費不貲日內無應商之件擬先回森堡以節糜費佳

慶邸李相來電 九月十五日

初六日奉電旨楊儒電俄允交還東三省該親王等與格使有無接洽須與商訂的確方可派員接收黑龍江將軍本日已放綽哈布增祺長順著奕勳等查明現在何處准其傳旨先行接管如無下落著於在京大員擇其堪勝任者酌保數人速電奏以便簡派前往並與俄使妥商保護商定電覆欽此查冬電索歸東三省外戶部意已允行並可少畱巡兵聽將軍調用當卽代奏請派員接收未及與格使面商恐有阻難望速請外部電諭以便接洽鴻再與商長順增祺存否如何下落俄將必有稟報卽查詢確電示此閒山永至奉錦皆被俄據信息不通無從設法查詢傳旨慶李蒸（校者註·冬電似東電之誤）

電俄外部大臣 九月十六日

慶王李相蒸電稱現俄顧重睦誼允交還東三省當卽代奏九月初六奉旨放綽哈布爲黑龍江將軍與盛京將軍增祺吉林將軍長順分別接收三省地方等語現東三省旣已明奉我大皇帝諭旨派員接收應請貴大臣電飭該管總督統領選與該將軍等接洽從速交收地方以踐前言而敦舊好茲有致盛京將軍增吉林將軍長黑龍江將軍綽通電乞分別代發電碼列下

電增張綽將軍通稿 俄外部代發

慶親王李傅相復電稱初六日電旨楊儒電俄允交還東三省黑龍江將軍本日已放綽哈布增祺長順著奕劻等查明現在何處准其傳旨先行

接管欽此查尊處冬電索歸東三省外戶部意已允行並可少畱巡兵聽將軍調用當卽代奏請派員接收長順增祺如何下落俄將必有稟報卽詢確電示此間信息不通無從設法傳知慶李蒸云俄允交還東三省 儒已向外戶部商明由俄總督統領逕與諸帥接洽立據爲憑現既奉諭旨尊處應卽遵辦 儒一面催外部電飭該總督統領從速交還以踐前言而敦舊好乞復銑（校者註：冬電似東電之誤）

電慶邸李相 九月十六日

昨回森堡兩蒸電敬悉索還東三省前詢外部曾否電知格使據云須電彼處總督統領逕與各將軍接洽交收彼此立據爲憑此事與格無涉等語尊處未與言及正合機宜據外部稱長帥出遊俄軍兵不交刃盛京官

員出城預避增帥仍爲俄官截回兩帥現均健在 僞已傳初六日旨並蒸  
電語託外部分電增長綽三帥欽遵辦理可冀穩達一面催外部電該總  
督統領速辦交收接復續陳銑

李傅相來電 九月二十二日

蒸電計達昨始接佳電俄允漸撤東三省兵交還地方由俄統領逕與該  
將軍商辦與格使言相同增長如存已請阿提督等代傳旨與商一切但  
無由通信耳鴻諫

電慶邸李相 九月二十五日

外部復稱派東三省將軍應先與該處統領妥商當駁以何不早言必不  
將已則增長綽三帥卽作預商擬派之員貴統領當無異詞並催復免誅

罪首一節伊電稱俄主現患時症稍遲再復先聞 儒有

電李傅相 十月初二日

俄主時症轉傷寒各國主電詢起居 儒一面傳旨問好一面請奏明免周折費時冬

李傅相來電 十月初六日

敬冬已轉奏吳到京數日察探各使會商多次意見不一久不開議恐變局甚著急欲中俄先開議東三省事恐各將軍難專主請派全權與彼在京商辦並蒙古金鑛等事望密商戶部奏俄皇即派吳全權專商以上各節格仍與各使開議大概交涉三省事定各國分奪土地之念自息和議亦盼速成俟奉旨即電奏勿提鴻議支

電李傅相 十月初七日

戶部未歸支電加函轉達得復再聞 備陽

電李傅相 十月十三日

維特復電稱鄙意各使與中國議件未定以前未便在北京另有商議云  
初各使議款脅允各政府默許者居多嗣美持公論以爲太過首創駁議  
俄復從而和之斥格使畫諾之非他國不甘讓美因之游移聞堅持者僅  
德奧意數國此是一大轉機維目下殆欲靜察少動不欲輕滋眾議故復  
電云然 儒元

李傅相來電 十月二十四日

吳克謂俄主病痊應致國電慰問並謝交還東三省力保中國土地主權

頃已奏准由京發洋文電逕遞黑海行宮免由彼得堡外部展轉稽延俄主必有復電允諾以堅前約東省交收或更妥速吳另電維特贊成希與接洽鴻養

電李傅相 十月二十五日

養電譯寄維特並加函懇贊成俄主復電外戶回都尙未定期備有

李傅相來電 十月二十九日

有悉裕使譯交俄主覆電略謂電內所表之情誠爲鳴謝朕夙益中國之心如何重大惟望大皇帝亦百方圖謀冀速復兩國夙誼云語太空闊吳克與格意見不合卽日回俄仍許遇事襄助維特望告戶部於東省交收事勿聽格言鴻勸

電李傅相 冬月初二日

勘悉遵告戶部務踐前約勿聽格言報傳蓋躬偶有違和已大愈否便乞電及以慰懸念 備冬

盛宗丞來電 冬月十四日

奉旨楊儒著授爲全權大臣與俄國商辦接收東三省事宜此事俄廷深敦睦誼允許交還一切辦法須臻妥協著楊儒審時度勢悉心籌畫隨時電商奕劻李鴻章互相參酌並著奕劻等傳諭東三省將單遇事妥爲經理毋稍歧誤欽此文宣轉元

電李傅相 冬月十四日

盛轉文電旨授 儒全權商辦東三省事外部尙未歸屢次譯轉公與江鄂

督各電其答語非空卽宕竊慮此事彼方屬意格使突宣此旨倘竟不允在儒失色猶小而輕卻諭旨此端斷不可開正在躊躇適維特至自黑海晤探語氣始悉此乃俄意由公奏請而維特訝儒不知情當將諭旨譯寄黑海得外部復再聞蓋躬諒復元甚念寒

李傅相來電 冬月二十一日

授公全權本係外部意前令杏蓀將電奏轉致格意將此事全推執事鄙謂仍須隨時請旨增祺與阿提督小有齟齬長順與俄同住至今未通函牘黑新簡綽哈布係善慶胞姪尙在途人雖和平亦恐自出意見將來不易結束公與三省通電由俄綫發爲便應否自訂密碼告之頑驅全愈鴻效

盛宗丞來電 冬月二十六日

邸相蒸電奏楊迭奏俄主願將東三省交回由外戶部面允在案嗣吳王及格使均以事關重大三省將軍號令不一賢愚不等商辦恐難畫一須另設法今吳王已回國格使接政府電商議在彼得堡舉行較便宜照請奏懇大皇帝於出使大臣楊授以最寬之全權俾不曠時日與俄政府悉商議定一切等因臣等查從前交收伊犁曾派曾紀澤爲全權大臣往俄商辦今東三省關係更重事由俄外戶兵三部主持自宜在俄商訂爲妥楊洞悉時勢與其各部推誠聯絡情形最熟可否俯如所請授以全權大臣重任俾得乘機妥議交收事宜當於大局有裨仍請嚴飭東省將軍遇事電商楊勿稍掣肘俾臻妥協云宣轉敬

慶邸李相來電 冬月二十二日

格使謂電旨隨時商奕李互相參酌恐轉折遲誤全權不專告以樞廷弄筆故套全權只須請旨不必與我等參酌彼允將正款轉達外部至此間與三省驛電不通無從傳諭已請阿提督設法電知格謂交收尙在未定不知何意吳由滬行到後可向詢一切慶李號

電李傅相 冬月二十四日

維初閱電旨卽謂全權不足告以事體重大斷難專主來電正款何指吳未到維頗不滿於彼恐難爲我用外部歸尙未晤 備漾

電慶邸李相 冬月二十日

宙密文旨未接照復外部卽日回都洋報傳增將軍與阿提督各派員互

訂奉天交地九款業經畫押摘譯大略如下 一由將軍保護地方助造鐵路 二保路俄兵房屋糧食由我供備 三遣散華兵交出軍火 四毀拆全省礮臺火藥局 五地方安靖後再交還牛莊等處 六地方歸我自備巡捕彈壓 七俄派員駐盛京預聞要公 八遇事如華捕力尙不足由俄派兵相助 九各款以俄文爲準云密詢戶部云確有其事惟係兩國新約未定以前暫時辦法然此事果確流弊無窮倘彼挾此成見東省不失而失商辦之件將何從措手當與駁詰至再伊稱中國旣肇此大禍若不慎防將來勢必一誤再誤俄非孩提可以屢欺等語竊思歸地一節彼旣面允決無翻悔但恐所謂交還是吏治而非兵權有空名而無實惠深用焦慮 儒九月間由外部轉奉吉江三帥電並傳初六日旨暨蒸

電話迄今無覆恐爲該處俄官所阻以致東省消息彼通我塞除外部晤面語氣容續電外先將所聞奉省情形暨維答語密陳乞酌奪轉奏并祈示覆再來電請由宙本較密乞轉劉張芻

慶邸李相來電 冬月二十八日

芻電已代奏並附電數語如下查增祺來信前因省城危急適已革道周冕由黑龍江來藩因其略習俄事派往旅順議和惟不應加全權委員之名致該員肆行無忌擅立暫且章程九條並未請示卽行畫押增欲改悔又派員至旅相商阿無回信聞頗有後言玩維特語氣想外部亦必堅持以從事實難辦且晉昌壽長各擁邊隊聲稱報復恐俄藉以開釁楊使所稱交還吏治而非兵權此實俄隱情成見牢不可破應如何密令相機維

持俾無決裂再格使屢言既授楊儒全權不應令臣等互相參酌致轉折遲誤以後但當自請電旨耳云慶李宥

電慶邸李相 冬月二十八日

外部廿二歸屢與訂晤改期至再似有所待又似計畫未決未知何意戶部密談擬訂之款如下 一兵費償款在京核定鐵路償款另算 一東省我祇設巡捕兵其數與俄商定 一簡放將軍須先與商明 一每將軍處俄派文武二員武稽巡捕兵數文辦鐵路等事 一滿蒙暨北省各項利益不得讓他國 一滿蒙等處我不得造鐵路 一金州城歸入租界 一俄代理滿洲稅關由我派員稽查進款 一陸路進口貨納稅後免內地稅 一中俄借款應改每月付息 一兵費賠款未清我無權贖

回東省鐵路 一俄欲購山海關至營口鐵路該價卽在兵費賠款內扣算所餘之數每年應還利息卽在滿洲稅關進款內扣算 一俄保路之兵訂明分期撤退 各款均伊口述 儒告以萬難全允賠款固應清算他事總須持平辯論良久伊稱細節可商大旨難改應勸中國允從勿以瘋愚視俄等語細繹各款暨戶部之言善自爲謀乘機圖我情形顯然查兵權利權與派官之權三者損一已失自主何況全損東省權利盡去已覺不堪何況牽涉蒙古暨北省一國如此他國效尤保全中國之謂何竊以俄如和平商辦作一榜樣應速與訂定如挾此成見自便私圖宜暫與延緩且俟各國訂約再商否則倘英於長江一帶德於山東全省均欲援例何以應之東省不守幸議交收堅拒非宜曲從不可事處兩難所宜通籌

定奪既經戶部談及合先電陳梗概乞代奏請示機宜并轉劉張備儉

慶邸李相來電 十二月初一日

和議草約已簽訂細章卽開議日本使小村忽言各國咸注意俄舉動深望東三省事早定免各國生心和局有變伊得俄京友人電戶部告以東省俄不侵占兵必撤回既明言交還似不能食言惟鐵路係俄資本畱兵保護須定限制或五千或六千否則名雖交還實同占據英德新約他國如得利益彼須均沾若東省陰爲俄有英必占長江德必據山東日本亦不得不起而爭利周冕在旅順所議乃武官欲佔便宜俄政府恐亦默允等語尊處與外戶部開議時不妨據此詰之或可發其陰謀希酌辦慶李勤

慶邸李相來電 十二月初三日

宙奉勅旨奕劻等徑電悉楊儒帶電所稱增祺派委已革道員周冕往旅順與俄擅立奉天交地暫且約章九條畫押等語閱之殊深駭託此事增祺始終並未奏明周冕係已革道員久已擯棄不用卽係暫且約章該革員亦無議定之權此次東三省交收事宜關繫重大楊儒旣膺全權重任著卽責成向俄外部婉切辯明務臻允協增祺擅行委員妄加全權字樣殊屬荒謬著交部嚴加議處俄與中國訂交最久近年於中國諸事無不竭力維持此次許還東三省尤爲深敦睦誼想俄廷亦斷不至以該革員私畫暫且之約遂執爲一成不易之據也李鴻章曾赴俄國立有密約更應統籌全局東三省安危所繫甚重著仍遵前旨隨時電商楊儒參酌妥

籌總期吏治兵權均不失我自主爲要格使所言當與力辯以期共濟欽此慶李東已

電慶邸李相 十二月初三日

豔晤外部據稱現議之約由戶兵部擬稿數日內可以送閱告以俄一意保全中國屢經宣告中外今議交地總須名實相副不但中國心感亦且環球屬目如無好榜樣恐英於長江雲南德於山東法於廣西日本於福建相率效尤流弊何極伊謂事隸戶兵勢難專主開議時當代爲調停昨奉勸電又撮要告外戶效尤一層前已屢言之與尊見脗合惟伊等均稱增阿暫約須先請政府批准畫押之件豈可不認答以增祺既未請旨革員決無全權斷難批准彼總以既訂難毀爲言儒爭之至再戶部允從長

計議然終未允毀儒又謂俄聲言保我自主何兵權利權派官之權一朝奪盡聲言不利土地何現商東省連及蒙古與北省太不爲中國地所冀實踐前言以固鄰好前口述各款決難辦到外仍諉戶戶稱懲前毖後不得不爾現正擬約稿可讓之處惟力是視云容再爭乞代奏江

電慶邸李相 十二月初六日

迭晤外戶約稿未就彼仍堅欲先批暫章再商正約答以暫章應毀已聲明在前相強無益貴國既欲我在此商辦今先以萬不可行者相強不但暫章無請批之理亦正約無開議之期徒延時日況貴戶部已允從長計議矣反復勸導戶躊躇久之始云如正約勿阻難此節當勉從所請答以如正約近理無不可商我祇可代奏允否全在政府連日辯論始將請批

一節爭罷此等枝節尙與正文無涉開議結束正難預料苦於權勢俱無  
唇舌寡效材輕任重焦急萬分乞先代奏稿到再陳 儒魚

慶邸李相來電 十二月十四日

頃奉行在軍機處庚電旨江電並楊儒儉電均悉交還東省種種爲難自  
應照楊儒所擬從緩商辦又奉軍機處蒸電旨楊儒來電籌辦爲難情形  
均悉仍著轉電該使堅持磋磨力圖挽救從緩妥商全在楊儒之隨機因  
應也欽此慶李文

慶邸李相來電 十二月十六日

頃接文電旨楊儒魚電悉東省暫約經楊儒辯論作罷甚是另立正約卽  
電楊儒極力磋磨斟酌妥善無負委任云慶李元

電慶邸李相 十二月十六日

外部晤稱伊與兵部均接阿提督電知增祺逮問兵部謂是顯與俄爲難頗有怒意外部亦謂治增卽以辱俄應速請將增畱任免治等語查暫章係阿奉俄延諭與增互訂如果逮問俄必不允崇厚舊案可鑒現正約方待磋磨暫章已罷批准外部所請似不宜過卻致生枝節乞代奏請示俾速照覆 儒諫

慶邸李相來電 十二月二十日

增祺先奉旨照部議革職著剋日回京不准擅議接收並無逮問之說嗣因俄使力爭奉旨仍准暫畱盛京將軍之任交收事宜悉聽楊儒辦理格使已允電俄京可酌量照覆正約條目何如乞示慶李嘯

江督劉來電 十二月十七日

增祺私約關係安危尤則各國效尤必成瓜分之禍除保護鐵路外凡有關自主之權均不可允務乞堅持力拒並將近情電示坤諫

電江督劉 十二月十七日

尊見正合鄙慮增訂暫款外部堅欲批准再議正約苦爭始罷現約款尙未交來要索勢所必至當謹誌公言餘詳哥儉電由慶李轉計到又江魚電可索閱 儒洽

電慶邸李相 十二月二十一日

嘯悉增畱任外部欣然並稱正約擬廿二會戶兵覆核廿四奏俄主廿六開議當趕譯奏聞前託俄發東省三帥電無覆遇事當續電 儒馬

盛宗丞來電 十二月二十三日

國書一道卽遞文曰大清國大皇帝敬問大俄國大皇帝好朕維講信修睦爲國之常經救災恤患交鄰之盛事中國與貴國交好二百數十年從無纖芥之隙本年六七月間中國京城亂民滋事一時撲滅不易蔓延及於東三省疆吏不善處置致煩貴國用兵是貴國代我剿平亂匪非與中國有隙也及各國聯軍入京貴國首先撤隊出都以明不貪土地之意并許貴國在我東三省兵力所及之處一律歸還義聲昭著環球各國無不欽仰朕前經兩次電書致謝諒邀鑒及茲聞貴國政府與統兵官持議頗異於前逼將東三省政權隱由貴國主裁而中國所得者特一空名如此則歐美各國勢將羣起效法有妨中國內治之權朕知尊意必不出此竊

思大皇帝篤念邦交信義昭著欲結歡中國之盛心至優且渥今日之事尤賴貴國主持爲各國示之準則中國與貴國毗連之界二萬餘里層齒相依他日苟有可以報答大惠之處當惟力是視所有東三省現築鐵路關繫緊要自應照常經理夫鐵路之利非獨貴國重之卽中國亦賴之也朕斷無漠視不加保護之理此次保護不力之疆吏已重加懲治以後當嚴飭地方官防患未萌盡力保衛務愜貴國之意朕昨已派楊儒爲全權大臣以便就近從長計議惟願大皇帝念我兩國多年交好與他國不同鑒朕此心俾我東三省政權無損悉照從前辦理庶幾兩國生民樂業和好永敦朕實有厚望焉 卞宣轉

電慶邸李相 十二月二十七日

約款先定廿六面交今稱須遲數天盛轉國書廿四遞并聞 傷感

電慶邸李相 十二月三十日

外部交約稿十二款節譯電陳 一俄主願表友好不念滿洲開衅之事  
允將滿洲全行交還中國吏治一切照舊 二東省俄路合同第六條准  
該公司設兵保路現因地方未靖該兵不敷須畱兵一股至地方平靖及  
中國將本約末四款辦到之日爲止 三如遇變急畱駐之兵全力助中  
國彈壓 四此次與俄攻擊華兵尤甚中國允於路工未竣及開行以前  
不設兵隊他日設兵與俄商定數目軍火禁入滿洲 五中國爲保安地  
方計凡將軍大員辦事不合邦交經俄聲訴卽予革職滿洲內地可設馬  
步巡捕與俄商定數目軍械除礮供差不用他國人 六照中國前允成

議中國北境水陸師不用他國人訓練 七爲保安地方計租地第五款  
隙地由地方官就近另立專章并將專條第四款金州自治之權廢除  
八連界各處如滿蒙及新疆之塔爾巴哈台伊犁喀什噶爾葉爾羌和闐  
于闐等處礦路及他項利益非俄允許不得讓他國或他國人非俄允許  
中國不得自行造路除牛莊外不准將地租與他國人 九此次俄兵費  
各國賠款均應清還俄名下賠款數目期限抵押與各國會同辦理 十  
被毀鐵路暨公司工師被劫產業又遲誤路工貼補均由中國與公司商  
賠 十一上項賠款可與公司商定將全數分出若干以他項利益作抵  
該利益可酌改舊合同或分讓利益 十二照中國前允成議自幹路或  
枝路向京造一路直達長城照現行章程辦理 外部云現因看重貴國

邦交貴大臣切囑經俄主戶兵部一再籌議凡可讓之處淘汰已盡所有者均不可少之款若尙未知貴國意實不知辦法等語細繹各款畱兵名爲保路實注意末四款禁運滿洲軍火禁用外人練兵并及北省水陸滿蒙新疆均有金礦礦路利益一網打盡又建入京枝路鐵路賠款用他項利益相抵蓋指關稅礦路等事隱而未露其侵我兵權利權以圖自便可謂周密深遠凡此均彼牢不可破之成見特乘此時藉此約要求而條訂之也惟據稱六款十二款我早允之禁我設兵指路成以前爲時尙暫禁運軍火係做京約懲換官員不始今日內地彈壓本不須礮長城以北由俄經營英俄早有成約又較戶部口述之款刪去商放將軍派文武員稽察兩節又稍減明索權利之款罷派文武員尤免鞵轎至增阿暫章之一

二四五七款暨繳軍械等事均未開列此卽彼所謂可讓者已盡讓也翫彼語氣甚堅各款應如何分別允駁仰祈訓示機宜乞代奏 儒卅

慶邸李相電 十二月三十日

行在軍機處電奉旨李盛鐸有電稱日本外部言此次中國萬不可割地如允割地與一國或雖未明割而允其設官置兵亦是暗讓一經允定他國必羣起效尤大局當不可問財政及各種利權亦然設有一國要挾太重中國似可答以此次事變關係各國宜歸入各國公約併議庶免受虧等語著奕劻李鴻章詳細斟酌妥籌辦理并轉電楊儒知之欽此英使亦傳其政府電諭東三省不宜另立約章致各國效尤英德密約第三款如他國乘機取地英德另行商明保守權利之法當時俄法日奧義美均經

復准今他國並未乘機取地俄盟書具在必不應攬我兵權政權利權致  
召衅端祈切實與俄各部言照日本擬歸入各國公約併議能否辦到祈  
商慶李勘



光緒二十七年分

電慶邸李相 辛丑元旦

俄主復書其文曰大俄國大皇帝敬問大清國大皇帝好貴國出使大臣  
呈遞賜書詞意甚摯實獲我心此次中國內亂俄辦理一切顧重邦交知  
已在洞鑒之中敝國會明白宣布俄辦東方事未變宗旨要不外保我鄰  
邦自主而已現承雅意申謝可見大皇帝深明此意惟無稽謠傳有惑聰  
聽致謂滿洲之事改變初議深以爲異實大不然各統領所奉訓條一如  
本國屢次聲明之語本國政府擬與貴國全權大臣商議者止欲尋二百  
餘年鄰好而愈加篤並不欲稍礙大皇帝主權且亟欲將滿洲全歸中國  
吏治一切悉照俄兵未據以前辦理惟詳細情節自應訂明俾中國官吏

次第復舊免再滋變擾我邊疆凡茲情節此次均應訂明所有發給貴國全權大臣訓條務令所商之事易於成功俾於中國大有益之舉迅得施行是爲至盼中國經此事故恢復舊觀永保太平暨兩國歷久不渝之交誼益加堅固彌殷厚望乞鑒此心 僑東

電慶邸李相 正月初二日

勘悉日外部言暨英政府電均以東事應歸公議其設謀用意甚深諒旨飭斟酌妥籌仰見朝廷鄭重至意竊以照尊意所囑切商俄各部一節有不得不通籌熟計者當兩月前格使述政府意願將東事在俄分議彼時卻之甚易逮已派全權專商而約款未就欲圖緩議亦尙未晚故 僑電亦有寬緩之擬乃國書已遞約稿已交俄主復書且催早訂今我忽欲改

圖恐彼非直不理卽嫌我猶豫不理則告猶不告猶豫則更加藐視倘一言不合竟罷交收在 僑債事之失小而關繫全局實大再圖補救遲矣愚昧之見如朝廷決意不欲另立約章應先請旨收回全權之命並由 僑與格使同時傳旨告俄外部改歸北京公議一面請英日政府逕商俄政府俄不畏我尙畏公論我不便觸俄怒而英日尙不致畏俄俄亦不致遷怒於我況中日同洲英德有約既云應歸公議據理折之振振有辭不爲越俎竊慮彼恐傷俄好不肯告俄聳我之言特預爲效尤地萬一俄因此決裂竟不另立約章亦不商議歸地彼效尤者更爲得計大局尤不可問 僑非惜一啓口之勞惟轉圜之計必須預籌謹候訓示遵辦請代奏冬

慶邸李相來電 正月初九日

頃俄格使來鴻章寓中痛陳俄京約款一事中國如聽各國纒言不願立約則東三省必永爲俄有試問東省係何國所佔係由何國交收各國豈能撓越告以約款有過當處應由楊使與各部駁辯如第八款北境水陸師不用他國人教練前使巴復羅福曾有照會總署並未允定十二款自幹路或枝路造路直達長城巴使亦有此說並未明言至京今忽添向京二字此二節並非已允成議八款蒙古新疆連界各處礦路利益不得讓

他國是歸俄壟斷他國若見此約必犯眾怒其實蒙古新疆並無他國覬覦礦路利益者各國禁運軍火正擬商改年限東省亦不應永禁凡此皆當由楊使逐細磋商貴國切勿性急格遂謂交還東省本國兵部及武官皆不願幸外戶部力持若聽各國浮言猶豫不定兩國邦交大局甚有窒

礙且各國無以此語告我政府者獨以不干己事與中國爲難必當置之不理除電行在軍機處外慶李陽

電慶邸李相 正月初十日

卅東冬電計均轉奏陽悉格使言與外戶部同約款交來 備卽擬駁十餘條有數條與尊駁格使語不謀而合本欲電質以勘電意在併議而止現未便與駁專候卅冬電回音也昨戶部約晤云前密談口述之款盡載泰晤士報北京訪事人來電伊意甚不悅後幸加密蒸

慶邸李相來電 正月十一日

魚虞電旨敬悉昨又晤俄使催索趕訂約款甚急與陽電所言相同切囑不可激俄廷之怒致卽決裂各國詭言嘗試欲離間我兩國邦交尤不可

信云頃又接俄戶部維特密電請將交還滿洲條款照所擬各節從速核准現經本國用兵力所取應行佔據之滿洲始能交還否則懸據將成久據我深願中朝勿信英日各國讒言蓋其心但欲損害中國如中國果照俄所擬條款辦理則俄用兵力所得之滿洲可仍爲中國土地此卽俄所以報中國也等語似此情形延緩實恐誤事各國私議全係日本從中唆弄蓋日使先來爲此說次英次德次美次意次奧劉坤一魚電所述日本領事串通各國之言皆明證也劉張素暱日英易爲所動日本亦但據報館傳播增祺旅順前約代爲過慮不知此約已廢若照俄廷約款除第八款蒙古新疆礦路外似尙無甚紕繆楊使卅電所謂可讓者已盡讓自宜早定爲是不致遂動各國之憤亦不至以一俄掣動各國各國不肯告俄

廷獨向中國饒舌其用意別有在甚謂不應立約交收大事豈能不立約據俄人謂其但願攪散不交庶各國皆可藉口佔我土地陰謀實不可問至旨謂將金州自治之權廢除與全行交還相背查此議係鴻在總署力爭而得亦知孤畱一城非久計數年來俄員與地方官常有口舌已不相安去秋竟將副都統及文武各官全行拘送海參崴庫頁島管押非和議速定不能釋回似此孤城畱亦何益伏候聖裁除電軍機處外鴻佳

慶邸李相來電 正月十二日

奉佳電旨奕劻李鴻章陽電悉俄使以此事與各國無涉中國當置之不理其勢固做不到若竟將俄約延宕不辦則三省必不願交還各國將相率效尤大局不堪設想朝廷體察情形若能乘機借力各國以圖牽制將

必不可允者除來電所指各款外如第七條內將金州自治之權廢除一款一併力與辯論但能做到勿佔據我土地勿壟斷我利權俾各國不致藉口或亦權宜結束之一法著奕劻李鴻章詳細參酌妥慎辦理一面婉商各使開誠布公協力勸俄相讓勿徒與我暗中爲難方臻妥善仍轉電楊儒酌辦欽此慶李青

慶邸李相來電 正月十二日

昨晤日本使詢及東三省交收一事如何辦法告以現經全權大臣楊儒與俄另議約款尙無奪據壤地財政之意但未聞各國向俄廷商及此事中國固欲早收回三省而各國欲我與俄緩立約何不徑告俄政府辯論再四彼謂宜令各國駐使晤商各外部請其轉致俄廷如不肯轉致則此

事各已聲明在案以後可免責言如告而不理其咎亦不在我所言似尙近理因卽日電致英羅使倭李使美伍使德呂使其文曰各國駐使先後來言其政府囑爲聲明公約未定以前中國不得與他國立約若讓某國土地財政之權另立約章恐他國效尤所論似正鴻答以何不預告俄政府彼謂當由我駐使徑商各外部請其轉致俄廷現俄已與楊使另議約款尙無奪我壤地財政之意催速核准否則覓據將成久據俄用兵力所得今議交收豈能不立約據公約十二款一時尙難就緒又豈能久待各國陸誼素敦未便倚眾阻撓致中俄決裂亦非各國之利也望善爲說辭電復是要等因似卽魚電旨設法統籌兼顧之意未知果能消融無迹否除電軍機處外慶李蒸

電慶邸李相 正月十三日

佳青蒸均悉應俟各國答覆再議 備元

慶邸李相來電 正月十四日

本日接軍機處電奉旨奕劻等蒸電李鴻章佳電均悉據日使所言電致出使各國大臣各節昨已有旨分電各使轉向各外部婉向俄廷曲爲商減與該親王等辦法大致相同惟交還條款俄催速定固難延緩致激俄怒然各國既嘖有煩言若稱不理亦恐藉口羣起爲難此中關係甚重親王等務當籌計萬全總期定約以後各國不致另生枝節方爲妥善至條款內仍有應力與磋磨者如陽電所指第六第八第十二各款必須商改鐵路直達長城向京一節尤關緊要又第四款路工未竣不設兵隊應專

指鐵路邊旁而言軍火禁入滿洲應與公約同時起止不得永禁第七款將金州自治之權廢除亦知孤城畱之無益特恐各國卽指爲割地實據藉口效尤耳第八款路礦各利益非俄允不讓他國宜聲明中國自辦不在此例或中國借款先儘俄國第十一款上項賠款可將全數或分出若干以他項利益作抵恐係注意陸路關稅及山海關鐵路等事必與言明須與此次公約各國利益相埒該親王等當妥細統籌務與俄使逐款分晰剖辯力圖挽救並一面電致楊儒按照此電所擬婉切商改毋誤事機爲要欽此電李元

盛宗丞來電 正月十四日

樞元電茲有國書一道轉駐俄楊使接遞並轉知全權其文曰大清國大

皇帝敬問大俄國大皇帝好。昨得還書仁人之言。大君之度。具形楮墨。惻感實深。嗣由楊儒遞到東三省約章十二款。逐細尋繹。似中國主權尙未能保全。無礙大皇帝書云。不欲稍礙主權。一切悉照俄兵未據以前辦理。惟詳細情節。自應訂明。免再滋變。斯言也。光同日月。誓等河山。今十二款所擬。似不盡照。未據以前辦理。蓋國書君之言也。約章廷臣所議也。夫思患預防者。謀臣之忠。而恤鄰仗義者。大君之仁。敵國東三省業已失守。仍以見還朕圖報不遑。但可勉從。何忍違異。無如東三省主權一失。各國皆從而生心。中國將無以自立。大皇帝欲力固和局。而尙不免各國藉口分爭。度必不忍出此也。況來書所云。仁至義盡。敵國自慶如天之福。大國必昭大信之言。前此之衅。朕知過矣。今日之事。惟大國實保全之。已飭敵國

全權大臣楊儒與貴國詳加酌議謹再致書道達苦衷惟大皇帝始終玉成朕與億萬臣民同深感幸矣元宣轉

電慶邸李相 正月十六日

元悉謹遵電旨及陽電駁款逐條開送外部力勸商改稱須商戶兵再定盛轉樞元電國書亦遞各國回音乞示及 儒諫

慶邸李相來電 正月十七日

蒸元電旨敬悉楊使元電應俟各國答覆再議是尙未開議格使因聞各國饒舌中朝游移負氣不肯相商頃璞科第來言格接本國密電云已定期期令商妥畫押如踰期須增出條款再踰期則決裂不與商辦羅使元電英外部但言商明德美日政府並未允向俄廷排解似卽排解俄必堅

拒此事竟無結束國書固甚懇切而部臣未必受商量恐愈緩愈緊務請  
熟籌利害相機因應爲要除電軍機處外慶李諫

慶邸李相來電 正月十八日

今日傍晚格使來言俄廷電問中國何日定議畫押答以楊使電應俟各  
國答復再議各使亦向敝處聲明不可遽許格謂此事與各國無干若向  
俄廷言及必堅拒碰回試思東省先與俄戰俄費許多兵力血戰傷亡若  
干人而得之今一旦交還實由我皇寬仁外戶部力顧睦誼所訂條款再  
三刪減並無礙中國主權若謂恐他國效尤各國現議畱兵保護使館及  
沿途駐紮與俄約暫畱兵一股同且俄畱兵尙有撤回之時連界各處蒙  
古新疆礦路不得讓他國若前數年英議定長江利益不許讓他國德議

定山東利益不許讓他國日本議定福建利益不許讓他國中國皆已允行何獨靳於俄尙慮他國效尤耶我此來實爲交情若置不理我國必有訓條另用公文限期成議勿嫌唐突因允將所言轉奏並電楊使旋又婉商有何通融之法因謂若以第八款各節第七款金州自治廢除或改作專條密約礦路宜聲明中國自辦不在此例格云伊不敢刪改由楊在俄商辦語畢悻悻而去除電軍機處外慶李諫二

電慶邸李相 正月十八日

兩諫均悉駁款望日送外部迄無回音昨又晤催據云戶兵未復但恐各款難減勸我早定告以中國並無他意祇因各國定欲效尤故難照允仍專候貴國回音商議詢以格璞限期畫押之說答語含糊所發訓條似祇

飭催促格等之言乃恫喝故智但恐外戶爲其所惑必至內外一氣探得英德意各使均晤外部未知何話僑約晤戶部以無暇辭此近日情形干乞祕之巧

慶邸李相來電 正月二十一日

奉篠旨奕劻李鴻章諫電悉俄約應行商改各節十一日電諭已詳細指明卽該親王等陽電亦稱第六第十二款內並非已允成議又第八款礦路一節必犯眾怒卽使各國不行阻撓亦均應婉切商駁況現在紛紛責言但能擇要商改則我可稍資補救卽向各國亦可有詞今勢處兩難必應計出萬全總期定約以後各國不致另生枝節方妥並電楊儒設法議改力圖補救是爲至要欽此諫電已代奏各國回音並無切實語大致擬

商明英德美日再定辦法公何不就近與各使電商慶李嘯

電呂李羅伍四大臣 正月二十一日

東約俄催速訂各國代我勸阻遲恐不及邸相囑逕商尊處外部辦法乞

速示 儲馬

電慶邸李相 正月二十一日

迭晤外部催覆駁款伊初稱戶兵不允商改當反覆力爭詰以俄屢言願  
作一好榜樣今反作僞實屬食言如必不肯商改我祇好請朝廷另派幹  
員或飭新使速來再商伊見 儒詞氣激切允再代勸戶兵商改頃接嘯電  
又往詢之并述篠旨伊稱昨晤戶兵竭力商量幾至齟齬始允略爲改動  
現正擬稿俟呈我主閱後再覆云各政府辦法已電詢我駐使得覆再聞

備馬

電慶邸李相 正月二十三日

刪改條約如下 四款原文中國允於路工云云至末句止現改中國爲保東省路工與開辦鐵路事宜並俄交界無事起見應與俄商定滿洲兵數及駐兵地方禁軍火入滿洲照各國公約辦理目前暫由中國自禁六款全刪 七款尾金州自治之權廢除句刪去 八款改云中國在滿洲全境內如未與俄先行商明不允他國或他國人造路開礦及一切工商利益 十二款改云九十八年九月廿八號中國向一私家公司借款造山海關牛莊新民廳等處鐵路直至滿洲有背中俄成約現爲酬報此層並爲速令滿洲平靖如常起見中國允東省鐵路公司自幹路或枝路

造一路至直隸滿洲交界處之長城爲止照現行會同辦理 右各節照  
屢次電旨與陽電商改 又五款革職字樣現改調離滿洲內地巡捕兵  
與俄商定數目加地方未經全行平定以前十字不用他國人現改祇用  
中國人 十款末句現改中國允照各國核准駐京各使擬定賠款意旨  
與該公司商賠 右各節經 儒指駁而改 按原約共十二條改爲十一  
款原第七至十二款改爲第六至十一款 外部面交改款欣然稱賞大  
臣迭次之言昨均面奏奉諭此次國書備極懇摯又楊使苦心我均甚感  
動未便固拒可照該使交來駁款苟可通融儘力刪改等因戶兵因此不  
敢堅執竟十允其九實可爲中國賀今改款經我主批定不再更易一字  
於本日起限十四天畫押逾期則交收作罷當告以我大皇帝與 儒均感

貴君臣厚意中俄舊好本無事不可和商但恐各國效尤無以應之伊稱此約畫押後當登官報試問何款可以效尤滿洲我兵力得之誰能援例等語謹按屢次電旨暨陽電各駁款除十一款所商未允外十二款雖未允刪亦改去向京字樣又聲明酬報山海關鐵路可杜異日購買此路之口其餘逐款照改如第四款與商駐兵地方卽非到處不准駐兵與專指鐵路邊旁之意尙不相背禁軍火照公約亦尙近情六七八等款一一聽命尤有關繫 儒駁各節亦稍爭面子十款尾所改卽與公約所訂相埒之意較有限制至效尤一層最要者如七八兩款已改十二款聲明緣由亦難藉口總之視原稿刪改過半不但免各國效尤卽蒙古新疆利權已保全不少上賴朝廷之洪福俾使臣得稍收脣舌之微效實非初料所及惟

十二款未能全就範圍爲可憾耳二月初七限期迫促外部語氣甚決從違利害有關東省大局乞速請示裁奪示遵乞代奏漾寅

慶邸李相來電 正月二十一日

頃接巧電旨諫二電悉前電格使負氣不肯相商今格使既來面言正可乘機向其婉商轉圜其原約內應議改各條已詳十一及昨日電旨第八條鐵路礦務由東北直抵西北所包太廣必犯眾怒第十二條內鐵路修建向京直達長城一語尤爲危險均須極力商改著奕劻李鴻章卽電知楊儒遵照前兩次及此次電旨向俄外戶部設法分辯委婉磋磨該親王等亦相機與格使婉商酌辦合力補救至所稱改作專條密約恐亦難免各國藉口總期妥協定約保我政權利權而不致各國有詞生衅是爲至

要本日據李成鐸電奏日外部言英有詰責俄廷之說未識若何措詞等語該親王等有無所聞亦密探電復欽此近日所議情形若何格竟無可商英詰責俄廷有無其事如何立言確探電聞慶李哥

羅大臣來電 正月二十二日

馬敬悉前遵蒸旨密商瀾侯據云俄約十二款果如泰晤士及領事傅磊斯所傳甚有關係今中國既令各國排解應請於未得各國回信之先務必勿許爲要當卽商明德美日政府再復等語昨經迭催復尙未到焦甚豐養

伍大臣來電 正月二十三日

迭商外部據云已電各駐使婉商未便過強廷養

電慶邸李相 正月二十四日

羅使復稱瀾侯云德美日尙無復音伍使復稱外部云已電各駐使婉商未便過強呂李復未到探聞俄外部告英使云俄現商交地章程未變宗旨英使並無詰責之語其問答已登路透報昨晤美使據云政府前致中國公文謂如許一國利益爲中國危曾將此文錄送俄外部 儒密詢伊看法如何據云各國詰俄須預備決裂中外尙未修好欲遽爲中國出力以敵俄大難等語現約款既經商改若必待各國排解恐俄未必再讓轉多一異日之酬勞不可不慮乞并奏聖裁熟籌決計敬

電李傅相 正月二十五日

漾敬計到轉千乞祕密外部稱不能再易一字亦不能展限或允或否一

言而決公看法如何請先示復 備有

劉峴帥來電 正月二十五日

東三省事賴公婉拒力磨實宗社大幸俄約各國迭相告語允必效尤禍成分裂反復籌思拒俄必干俄怒侵地難返然一俄尙不敢拒況眾俄乎若謂各國不能阻撓俄約俄卽不能阻止各國效尤是中國不允俄約非有吝於俄實爲關繫全局俄既念二百餘年鄰好不欲稍損主權豈轉忍使受分割之禍力既不敵惟有以情相感縱或不能各國既力勸中國不允若因此侵地不返各國自不能以此效尤兩害相形輕重懸殊矧俄爲各國深忌去秋因拳匪事英德卽先訂密約不乘機取中國土地告明各國照辦卽所以預杜俄謀俄知見忌各國是以亦曾聲明與各國公同一

致排解分割中國之端墨瀋未乾俄佔侵地各國豈肯默無一言若因俄迫而允是中自予俄即可箝各國之口如婉拒到底俄未必一無顧忌此中機括早在洞鑿務求始終維持切禱坤養

劉峴帥來電 正月二十六日

羅使漾電巧遵致瀾侯頃復婉切商催據云現正詰俄並商德美日中國只須抱定四國未回信東約不畫押俄尙不至別有加害一俟四國商定辦法當卽再告等語乞轉樞並慶李張云除分電外謹聞坤一迴

電劉峴帥 正月二十六日

養迴悉仰見苦心籌畫盡慮深遠與儒半月來焦狀正同查外部初次約稿允則各國爭索利權不分而分不允則失地數省效尤踵至仍歸於分

各國聲言互商迄無辦法據美使密稱各國詰俄須預備決裂中外尙未  
修好肯遽助我敵俄大難等語英俄兩年前密約長城南北各不相干姑  
勿論各國不出卽出爲排解繼以勸阻繼以用兵戰禍一開分局更速東  
省不歸俄則歸日若不出於戰何能動俄日夜憂思一籌莫展戶部謝客  
拒商若口迭勸外部曉以利害感以至誠始允代奏又得國書詞意懇摯  
俄主竟大感動飭照 儒送駁款苟可通融儘力刪改廿二交來改款頓然  
改觀凡初稿中北境水陸師不用他國人訓練金州自治之權廢除蒙古  
新疆礦路等節全行刪去滿洲內地許我練兵禁軍火照公約照成議造  
向京一路改去向京字樣且聲明因我背約允他國造山海關路以此酬  
報此後將軍肇事改革職爲調離內地巡捕兵與商數目加地方未靖以

前一句此兵不用他國人改祇用中國人鐵路賠款加照公約賠款意旨  
電旨共駁七條計允其五 儒另駁數條亦皆照允論駁款情節允者較重  
而未允者較輕據外部云限二月初七晝押逾期交收作罷不易一字亦  
不展期允否一言而決若云效尤試問何款可以藉口此約晝押卽登官  
報等語俄此舉無論其果感於國書與 儒之苦口或稍稍顧忌各國已隱  
爲拒各國地步夫各國效尤無非欲勢力均勻與其決裂而失東省終成  
分崩何若小失權利卽效尤尙不至大損故未改之前決不可允因失利  
太大與失地同既改之後情形稍變因失利較小終勝失地若不允而失  
地各國肯助我以敵俄乎直踵俄以分我耳若謂俄肯拱手還地決無其  
事現專候朝廷裁奪從違仍望公有以教之乞密轉香帥 儒宥

張香帥來電 正月二十六日

宙密東三省因增祺擅立單約致啓貪求賴公辯論維持深佩忠藎惟現議各條其害仍鉅各國譁然極力勤阻並謂我若許俄則各國必將效尤仍歸瓜分云云查俄與各國在北省聯軍俄廷曾布告各國俄與各國公同一致維持辦理將分割中國之端一切排解見諸俄國官報俄皇仁義已著不應食言又與各國已公同定立大綱十二款是俄亦當與各國事一律不應別有要求近日奉旨飭令各駐使請各國向俄排解各國外部云須將俄約稿錄送若不見俄約則所請排解者何事乃合肥李相謂兩國之約不能與各國看若宣布恐招俄怒云云竊所未解其實此約斷不能始終祕密俄怒不過不還東三省各國皆怒則爭相效尤一舉而中

國分矣尊意以爲何如擬請公可否向俄外戶部言明各國索觀約稿中國不能不將此約宣布以探其意似亦無妨探詢後祈速示中國極弱俄大國固不能抗英德日等六七強國又豈能拒動以情理是否有益再鄙人及劉峴帥此時有何策可爲公助力之處祈速密示總之鄙意此時萬不宜單定約中華全局存亡所關務望詳慎洞敬卯

張香帥來電 正月二十六日

宙密頃接某國外部電稱駐俄英使向俄政府問俄國此次所索約款與去年宣布之言何以不同俄外部答云新約內並無有礙中外條約之款且新約各款不過表明俄國願辦之事仍可商議刪改中國實願速行簽定在俄國並無逼求畫押之意何者聯軍未去北京中國政府未能照舊

辦事之前不願交還侵地此間多日不難商辦等語又與某國駐俄公使所言亦大略相同復加申明速願簽定此約者並非俄國而在中國等語特飛達以備裁酌洞敬辰

電張香帥 正月二十六日

兩敬均悉約稿照我送駁款刪改頗多已由峴帥轉達外部稱兩自主國立約畫押前向外宣若屬國不敢自專必須請示不在此例此約定後即登官報無款不可告人俄以兵力得滿洲誰能援例云前戶部密談之款電京後爲洋訪事探知登報戶部甚怒幾與俄絕交故約稿未便早宣至排解一節終恐難恃英俄約南北各不干預德首相昨在議院宣稱英德約不指滿洲美使言中外未睦助力大難日本雖欲報遼東之仇然小

不敵大改款視初稿迴殊效尤不易必待排解俄未必再讓恐轉多一酬勞之藉口耳俄云不逼中國而限期畫押不知何解從違利害策無萬全仍乞有以教之并轉峴帥感

電慶邸李相 正月二十八日

外部約晤稱限期已迫如逾期不畫勿再議交收勿再言友好前告各國不占地之文當收回作廢請電達政府云察其詞氣甚決竊意改款雖迴異原稿亦尙不免流弊然俄若久據東省不知各國果肯代我出力向俄理論抑將羣起效尤分佔土地此中機括關係存亡若將此意切詢各國勢恐不及日夜焦思萬全無計伏乞統籌訓示乞代奏 儒勸速轉劉張

李傅相來電 正月二十八日

漾電刺目處均刪除照允無後患英廷謂德日美商俄有辦法候覆再畫押日謂俄廷並未催畫押係中國自催外部皆簧鼓劉張以達樞恐爲所惑然阿提督已先撤瀋陽遼陽之兵殊痛快公宜加電催促破若輩迷惑鴻宥

盛宗丞來電 正月二十八日

八款是否原稿全刪另改中國在滿洲全境至工商利益卅五字細閱改本萬分欽佩一款吏治句能否改政權一切照舊方與下文所改各條相符十二款尙恐各國著眼能否再有法想宣有

盛宗丞轉軍機處電 正月二十八日

據江督電稱小田切以外部電來英文俄約十二條交閱大概與華文同

指稱首條專說吏治照舊不妥四條設兵與俄商定數目不妥軍火禁入滿洲不定年限與公約不符五條辦事不合邦交大員卽革與公約第十款不同六八條十二條應刪我不允彼必讓等語現在俄約已允略改恐擬改後仍多奪我政權利權與各國之意不合俄將堅執不肯再改轉多爲難希貴大臣於俄約尙未定稿以前先將以上所指各條與俄外部婉切商定體察各國情形相機酌辦務臻妥善爲要樞宥宣轉

盛宗丞來電 正月二十九日

奉旨奕劻李鴻章濛電悉據楊儒電稱反覆與俄外部爭詰已允將前約略爲改動如所改約稿仍有關係楊儒務當乘機按前迭次電旨所指各節再與婉切商改總以不致各國效尤貽害爲妥頃據羅豐祿電稱英瀾

侯云現正詰俄並商德美日中國只須抱定四國未回信不遽畫押俄不致別有加害侯商定辦法再告又據劉坤一張之洞來電日總領事梗電云日外部電稱駐俄英使已向俄政府詰以此次所索約款與去年宣布之言不符俄答以新約並無有礙中外條約之款不過表明俄國願辦之事仍可商議刪改中國自願速行簽定俄並無逼求畫押之意惟聯軍未去北京之前不願即還侵地是俄並非以決裂爲詞逼求定約聞議和某大臣謂若望俄交還土地必須速定此約其誤甚矣務望堅拒勿允中國如允此約各國必致效尤必致瓜分而後已是俄經英日詰問俄亦自知理曲與布告各國之語不符中國不難向其商改各等語詳覽各電俄既不認催迫定約且謂中國願速簽押是懾於各國公議有何轉圜之意奕

勳李鴻章務當堅持定見婉商俄使設法從容磋磨務臻妥協又據呂海寰電稱各使倘肯公同調停則公約速結再商俄約乃爲上策聞德索兵費三百兆馬如西四月以前不能撤尙須加增等語是各國公約宜先迅速議定該親王等迅卽向各國妥議各款早定和局勿再延宕尤爲至要再劉坤一張之洞屢請宣示俄約謂此約係俄自定勒派並非我與商定者無妨布告各國言亦近理或將此約交與各使閱看並著酌辦又據張之洞電陳俄約效尤之害一俄路駐兵令我供房屋糧食若效尤則蘆漢粵漢鐵路洋兵布滿中國二東三省只准設巡捕不准設兵若效尤則京城及直隸全省皆不准設兵三東三省撤臺禁礮若效尤則京城及直隸全省皆無一礮四大綱十二條原有禁軍火一條前與英德使電商須定

年限英德使復電均云可以商酌今東三省另立禁軍火一約與內地有礙五北省沿邊蒙古新疆皆不准中國及中國人開礦造路須商俄人北邊數萬里已非我有假如各國效尤英於長江德於山東日於閩法於滇皆不許中國自開礦路中國全國政治土地理財行兵之權皆爲人有且我於東北西北各省准他國人開礦造路尙是牽掣維繫之策亦不能允俄人阻斷他國之請任其壟斷待其吞噬中國一綫生機只在各國牽制一語豈可自行割斷六直修鐵路到京俄有護兵而不准我設兵此永遠危險不待效尤等語所論尙屬透澈奕劻李鴻章楊儒務當詳加參酌總期中國政權利權不致全失毋使各國效尤爲斷欽此有除轉京外宣轉宥

盛宗丞來電 正月二十九日

漾奏沁始到恐誤事機已有沁旨命尊處展期並飭劉張及弟籌議總期各國不致藉口效尤爲主而各國謂京直亦兵力所取羅電請候四國回信畫押公宜將電報周折婉請展限並電劉張方免愆誤宣勸

盛宗丞來電 正月二十九日

奉旨奕劻李鴻章轉楊儒電悉俄約更改在俄尙敦睦誼楊儒頗費磋磨惟其中細目尙有窒礙之處恐爲各國藉口如第一款吏治照舊而不及利權兵權應商改爲一切照舊第二款辦到之日爲止爲日太長應商改爲開辦之日爲止第七款尤關緊要現改仍包括太廣必招各國之忌或於工商利益句下添中國自行設法造路開礦等項利益不在此例似此

添改無多當尙不難婉商此外如尙有何關礙之處著奕劻李鴻章楊儒再行詳細推敲務臻妥協限期過迫倉卒定議英日美等國尙無回信仍難免藉詞效尤應再婉商展限總之此事關係大局甚重全賴奕劻李鴻章楊儒彼此電商博訪周諮熟權利害輕重以定畫押遲速俾免俄國及各國別生枝節致貽巨禍是爲至要奉天交還地方著奕劻等電知增祺妥爲接收欽此沁宣轉

電慶邸李相 二月初一日

沁旨敬悉卽刻約晤外部以無暇辭不得已將電文撮要譯成節略送去仍原封交回不閱亦不收展限之言竟無由達大約格使之電已到觀此情形實難理喻未知初七後是何舉動殊深焦悚 儒東請代奏速轉劉張

慶邸李相來電 二月初一日

頃俄格使來言專爲傳俄皇諭旨述外部電文云本部面奉諭旨前中國皇帝國書以拳匪肇亂實屬中國大錯請我朝廷察容務將約章難行之處概加刪改刻已改定不能增減一字限期兩禮拜命外部與中國楊使畫押示各國以大公且見朝廷與中國寬容之度倘逾期不畫則東三省由我自便所改約章作爲罷論著該大臣電致駐華使臣格爾斯詳達照辦勿稍遲延等因語畢遽起欲去鴻問尙容我商量否格謂已改之約不能再商已定之限若再遲逾禍患甚大又告以英廷現商德美日四國未回信勿遽畫押俄廷看此事如何格云俄廷不論他國意見此約畫後宣示誰敢攔阻請中國熟思願與俄好則畫押若願決裂聽便鴻問尙能展

限否格云展限非我敢說亦非我能代傳格去奉沁電旨仍令商改恐楊使亦難措詞若慮各國效尤照現改之約似不至於貽禍限期初七已滿務求速電畫押以保危局勿多顧慮請代奏除電軍機處外慶李勛

軍機處來電 二月初一日盛轉

樞勘電奉旨奕劻李鴻章密轉楊儒兩電均悉俄約雖已多商改然仍有窒礙之處恐爲各國藉口效尤圖我並非望各國助我排解也此約關係利害甚重必須詳細熟籌期限太促務再商請展限寬以時日從長計議方妥卽如第一款吏治一切照舊應刪去吏治二字改爲一切照舊則政權利權俱包在內第二款辦到之日改爲開辦之日第七款添中國自辦不在此例末款長城鐵路亦須再酌改輕或有詞以謝各國昨已電諭會

同妥商酌辦此事全賴奕劻李鴻章楊儒安定總期定約後各國不致藉詞貽禍爲斷朝廷非必堅持也楊儒可明告外部中國深賴俄爲保全所請展限商改實恐各國藉口效尤爲害不能不慎重徐商務請見諒爲要  
欽此勘宣轉勘

李傅相來電 二月初二日

頃據英薩使來言訪聞末款中國向一私家公司借款造山海關牛莊新民廳等處鐵路直至滿洲有背中俄成約云此事未聞成約若何鴻迴憶當時胡燏芬向匯豐借款造關外鐵路合同已定巴復羅福來署吵鬧不准借洋款造關外之路備有照會存案因係已成之局英又不准違約但謂以後不再借洋款並未互訂約據實無所謂成約也議改款時想未深

知原委今勘電旨令再酌改輕應將有背中俄成約現爲酬報此層十二字刪改免英藉口薩允將此層電政府轉達俄廷並告以俄限太促務請轉致展限俾得從容商辦薩索閱俄約全文未經與俄商明未便給閱務乞相機磋磨勿致決裂除電軍機處外鴻豔

電慶邸李相 二月初二日由盛轉

外部堅拒不見戶兵亦然昨又浼道路部代爲轉圜頃據復稱此係奉國主命不易一字不展一日我因不願與公使當面絕交故未允晤望轉致見諒云外部如此勒逼似預爲永據地步 儒奉使無狀上負委任惶恐無地究未知四國有無確復能否代謀轉圜不勝焦灼乞代奏并轉劉張冬

電慶邸李相 二月初三日

勘旨敬悉又兩詣外部仍辭不見復託美日使轉圜均云未奉政府諭不  
便干預遂將電旨譯送仍不肯收彼蓋欲藉此脅制也展限之言竟不得  
達何論改款現四國既欲我候彼回音薩使又允電政府應如何設法遷  
延俾得妥籌良策謹請訓示機宜不勝焦灼待命之至乞代表奏并轉劉張  
儒江

劉峴帥來電 二月初三日

宥電悉已轉香帥改約與前迥異具仰鼎力斡旋俄廷睦誼尤爲可感唯  
其中尙有礙我主權之處滿漢相連接修鐵路未免僭人尤甚不可不再  
磋磨且各國原議公約未成之先中國不得私與他國立約今公約未定  
而先定私約各國將羣起與中國爲難務祈尊處向俄外部婉商展限以

舒眉急俾得從容妥籌方爲始終成全之道又英謂詢明俄廷並未偪令中國立約畫押係中國自欲速成云云可否便中轉詢俄廷有無是說統候卓裁坤冬

軍機處來電 二月初三日

改約十一條已見俄皇顧全友誼亦見執事苦心惟約中各條有數處爲各國公約所無亦非中俄鐵路前約所有各國勢必藉口均沾前電命商展限又專發國書務望親向外戶部將中國爲難實情婉切與商總期各國縱使效尤仍與主權無礙爲一定宗旨一面將晤商各節隨時電聞樞東

盛宗丞來電 二月初三日

畫與不畫公責皆重長城路不刪則不問鑿三省在俄掌握何爭遲早過此以往朝廷必念交誼予權利於無形俄可獨得此俄向來辦法更改舊度則動眾怒同沾何及獨利公宜將此意密速直達若無國書刪改即可畫押宣冬

軍機處來電 二月初四日

國書速電楊使轉遞文曰大清國大皇帝敬問大俄國大皇帝好據楊儒電奏大皇帝允將前約和平刪改深感大德本應照允惟第一款吏治照舊第四五款滿洲兵及內地巡捕商定數目第七款全境一切工商利益第九款遲誤路工賠費第十一款自幹路或枝路造一路至長城皆爲北京現議公約所不及聯軍未退各國勢必執定利益同沾藉口勒索在敵

國歷荷貴邦維護何事不可通融但因目前急急圖報貴邦而使各國從旁效尤致各國所獲意外之權利與貴邦相埒失我通國永遠之主權諒非大皇帝之所願亦非大皇帝向來相待之本心楊儒轉奉還書欲尋二百餘年鄰好而愈加篤並不欲稍礙主權且亟將滿洲全歸中國自理一切悉照俄兵未據以前辦理語語肫摯與薄海臣民感激至於涕零現在期限甚迫是以一面飭令楊儒商請展限總之事出兩難與其事後受制於各國不若事前專懇於貴邦可否請飭下外部將所指約中數處准予刪去俟接照允回電卽當飭令楊儒畫押區區苦衷惟大皇帝格外鑒原東

軍機處來電 二月初四日

勸電囑薩使向俄廷商刪末條有背中俄成約十二字並代請展限甚善  
東電已進呈昨已電英今復電日德美皆由駐使請各外部均電俄代請  
展限能趕及否亦不可知做到一分是一分耳頃盛電云俄約如畫德先  
以山東效尤英日法必相繼而來逾限東省不還各國效尤一畫押各國  
羣爭亦難瓦全萬分焦慮究竟利害孰輕孰重尊處必有確見如俄能展  
限如天之福若竟不允能再商改不使各國藉口儻二者均不能行惟有  
請全權定計朝廷實不能遙斷也樞冬

電軍機處 二月初四日由盛轉

國書冬電敬悉外部屢詣不見國書公文一概不收絕我已甚悚憤萬分  
畫押與否後患輕重視俄及各國辦法如何 儒未奉畫押之旨不敢擅專

西例定約須互校畫押憑據未奉明旨俄決不允現在四國代請展限尙無消息日夜焦惶百思無計不勝迫切待罪之至乞代奏支並轉慶李劉張

慶邸李相來電 二月初四日

奉東電旨勘電悉畫押限期已迫昨沁豔兩電指明各條中若再能商請照改更較妥協來電既稱照現改之約似不至貽禍該王大臣等果有確見乃可定議惟英瀾侯曾有候其回信之語仍恐各國藉口將謂私行定約似應明告各國以俄已和平商改又定期限甚迫中國勢處萬難不能不允幸知照在先較之不告卽畫稍妥總之此約關係甚大惟在該王大臣等權其利害輕重以籌定議此是內意已鬆接尊東電當立斷頃羅使

電瀾侯謂第十款蒙古新疆字均刪與原稿相衡爲害較輕但仍欲我緩允應由尊處明告英及各國駐使勢處萬難不能不允一面卽酌量畫押勿誤慶李江

電慶邸李相 二月初四日

江悉畫押須有切實電旨方可作爲憑據餘詳盛轉支電 儒支茂

盛宗丞來電 二月初四日

東冬電已奏轉德似中立英日但偪我勿畫薩允代請展限東國書能遞入否只候此信是否初七爲止宣江

慶邸李相來電 二月初五日

頃電軍機處以奉東電旨籌度再四俄外部不見楊使電文原封交回展

限不允至初七限滿只四日若再游移勢必決裂後患甚大旨令定議事  
機萬緊大局所關不敢諉卸因卽錄旨轉電楊使請其明告英及各國駐  
使勢處萬難不能不允一面卽酌量畫押云發電後日本小村使來傳其  
外部訓條囑勿畫押告以逾限不畫俄必決裂將何以處彼謂各國應起  
而言於俄問責言而俄不理將若何小村謂以後事不可知奸滑可惡傍  
晚俄格使又來傳其外部訓條逾期不畫押東省永遠不還以後遇事俄  
亦不能助華問各條能酌改卽可定斷伊謂來催畫押不與議事問畫押  
後各國責言俄須助我格唯唯而去請代奏云慶李豪

劉張盛來電 二月初五日

俄約各國譁然立待效尤中國士大夫已多病公行在亦無成見如此約

果定各國另生枝節中外矢集竊爲公危請統籌全局格外慎重坤洞宣  
江

電慶邸李相 二月初五日

未奉允准電旨彼不認使臣畫押之權乃訂約通例昨經電陳頃接劉張  
盛江電俄約各國譁然立待效尤中國士大夫已多病公行在亦無成見  
如此約果定另生枝節中外矢集竊爲公危等語竊以此約定後果於國  
家有益 儒何敢愛惜此身畏人交謫惟中外議論既謂各國立待效尤加  
以通國士夫羣焉力阻該督等身在中國必確有所見而云然朝廷俯察  
民情亦不便輕違公議卽 儒在外洋辦事亦不敢罔顧眾論謬然允行歸  
咎一身事尙小貽憂君國罪莫大焉現限內不及畫押已可塞各國之口

慰中國士夫之心一綫轉機但求俄不遽決裂則天下幸甚萬一激成永據之局應請旨飭下內外臣工預籌補救萬全之策 備無任企望焉乞代奏微辰

電慶邸李相 二月初五日

戶部一月拒見頃忽約晤言璞科第電稱中國政府已發訓條飭貴使畫押答以我只有樞冬電及李相江電令我酌量定計畫押原電可請閱看伊云此萬不足當發急電催中國速給切實之權 備告以已趕不及伊答如因電旨未到遲一二月我當竭力設法不至即日決裂過此我不敢知云乞酌奪代奏微末

盛宗丞來電 二月初五日

江電已奏轉電旨譯送不收是否指東電國書乞示宣豪

李星使來電 二月初六日

頃商外部允電俄使勿逼定約令中國爲難東約歸北京會議期保中國  
自主之權語甚切實已由珍田達俄廷有此轉圜務請勿畫押以保大局  
鐸歌申

盛宗丞來電 二月初六日

支電已照奏轉國書不收實出意外羅支電瀾侯函一各國駐使先後向  
各國聲明公約未定以前中國不得與他國議立專約現再申明二展限  
一節如限內不能將窒礙字句盡行刪去仍屬無用三中國如將俄約畫  
押將極危險如將英應有權利奪去英必向中國賠償等語歌旨尙未見

公支電非款改妥無礙公約不敢遽行畫押現商傳相電吳王轉圜公可速將往回電報遲緩一層切託吳王略展以待設法全仗公苦心轉圜此係弟私見乞速示宣魚已

電盛大臣 二月初六日

豪電敬悉欽使頃下車傾跌神思恍惚不克作答俄館參隨等謹復

電慶邸李相 二月初七日

王爺中堂鑒昨外部忽約欽使往晤間接畫押憑據否並云明晨九鐘須見俄君如九鐘前無中國畫押電旨卽以不允此約入告語畢卽起不容贊一詞欽使數日前跌傷右腿行動需人自外部回署下車雪滑又跌昏不知人趕延西醫施治現神氣恍惚言語不清看之實深焦急參贊胡惟

德繙譯陸徵祥謹稟虞

盛大臣來電 二月初七日

奉旨俄約關係重大疊經諭令奕勸李鴻章楊儒熟權利害輕重妥籌辦理迄未據切實覆奏昨據各督撫及各駐使紛紛電奏皆以堅持不畫押爲害較輕昨又具國書懇俄展限酌改總以不肯公約各國不致藉口爲斷亦未據楊儒覆奏朝廷細思不遽畫押僅只激怒於俄畫則羣起效尤分據其禍尤速卽著該王大臣等分告在京各使中國不敢遽允俄約畫押請先議公約並著楊儒婉告俄外部中國爲各國所迫情形非展限改妥無礙公約不敢遽行畫押請格外見諒欽此歌宣轉

盛大臣來電 二月初八日

奉旨俄約限迫昨兩次電旨令該王大臣等權其利害輕重妥籌定議諒已遵照熟籌今各督撫及各駐使紛紛電奏均以此約畫押則各國羣起分裂爲害甚重若不遽畫仍力向俄婉商再改總以與公約不致歧異則各國無可藉口縱使任俄怒而不還東三省各國必出而公論必不致羣相效尤爲害較輕應飭全權向俄使切商妥改勿遽畫押並詢各國公使以滿洲礦路工商利益俄約獨佔鐵路至長城俄亦獨踞恐與公約有礙請各國合力向俄展限商改且請在京早定公約等語眾論相同自難輕率畫押已飭盛宣懷將各疆臣各駐使電奏擇要電達核酌此事關係甚大既無兩全之策則兩害相形自應從其輕者著奕劻李鴻章按照各電所陳妥細籌度慎重辦理並著楊儒亦據此告俄外戶部中國已復遞國

書相懇實迫於各國公議此約非改不敢遽定想俄主既實心保全中國必不忍強其所難坐視受禍也該王大臣等其慎圖之欽此支除分電外  
宣轉

電慶邸李相 二月初七日

欽使經西醫施治稍有轉機神氣忽明忽昧動轉艱難醫稱恐成偏廢今奉歌旨德等謹將旨中要語譯送外部閱看閱畢但言今我無話可說以後情形請中國自看云參贊惟德繙譯徵祥謹稟陽亥

盛大臣來電 二月初八日

奉旨奕劻李鴻章魚電轉楊儒微未電悉俄外戶部既約楊儒晤言是有轉機國書自必乘此呈遞著楊儒卽婉懇照國書內所請各條如吏治照

舊末四款辦到日爲止滿洲兵及內地巡捕須與俄商定數目滿洲全境一切工商利益自幹路或枝路造一路至長城等語全行刪讓以符北京公約可免各國藉口如俄約肯允照改迅速電聞卽可定議既可通融一二日請多展數日並將中國爲難情形婉切懇告或先議公約再議專約中俄脣齒圖報之日正長毋於此時逼緊俾各國羣起效尤至俄約中有礙中國主權及各國利權與公約不符之處奕劻李鴻章亦應向各國密商請其公議設法斡旋總期定俄約後各國不與我爲難爲斷或將此旨煩璞科第轉電俄外部以期必達欽此陽宣轉

盛大臣來電 二月初九日

樞庚電奉旨英瀾侯既有各國駐使向中國聲明公約未定以前不得與

他國議立專約之語奕劻李鴻章必早知之當日亟應先行商定公約今  
呂海寰電稱德外部亦云俄約須由各駐使公議至公約德自能在京照  
常辦理等語昨電旨飭楊儒向俄婉商總照國書所懇將有礙中國主權  
及關礙各國利益之處全行刪妥不與公約相背各國無可藉口方能定  
議迭次電旨已詳細聲明設急難就緒惟有切實商懇在京先定公約後  
再議專約爲斷楊儒務當盡心竭力婉切商懇先定公約想俄厚意保全  
中國必能相諒並著奕劻李鴻章在京亦將此意向格使確商卽與各使  
迅速妥議早定公約以免牽掣遲延致誤和局是爲至要欽此庚午宣轉

盛大臣來電 二月初十日

樞電胡參贊電稱楊使跌傷恍惚日來已漸愈否卽將詳細情形電復佳

宣轉

電盛大臣 二月初十日

請轉行在軍機處佳電敬悉欽使初三跌傷右腿行動需人初六外部約晤勉強前去回署下軍雪滑墜地傷勢甚重昏不知人急延西醫診治敷劑兼施漸見功效刻下神氣稍清痰涎見少微進湯乳今已五日醫稱現在始敢言保性命恐難免偏廢云參贊胡惟德稟復蒸

軍機處來電 二月十二日

亥密盛大臣轉駐俄參贊庚電貴大臣病勢稍減爲慰總宜趕緊調治期早勿藥所有上年十二月卅電俄約十二條本年正月漾電刪改俄約十一條均希貴大臣迅飭胡惟德陸徵祥照錄法文校對無訛密由郵船速

寄上海交盛大臣轉寄行在備查勿遲爲要樞真

裕星使來電 二月十二日

報稱公有小恙想已大愈念甚示復庚真

劉制軍來電 二月十五日

聞貴體違和至深馳念近日眠食如何乞電慰坤咸

電李傅相 二月十五日

中堂矜鑒久不奉電惶恐萬分 儒猝遭此症展轉牀蓐困苦難言醫云性命可暫保偏廢恐難免亟望新使速來交卸內渡玉關生入獲正首邱得如仰藎幸矣雲天援手銜結難忘日來神思稍清而舌澀左半體麻木如故勉強口授代辦胡惟德電陳伏枕哀鳴切盼示復咸

李傅相來電 二月十九日

咸電悉執事力任艱鉅勞瘁鬱結致成痼疾異國風土調養非宜馳念曷極約款現既齟齬改派新使恐俄不允望速向外部探明電復倘不致堅拒始可奏請仍希隨時加意衛攝至盼鴻巧

電盛大臣 二月二十日

請轉行在軍機大臣均鑒 儒粹遺危疾已經半月展轉牀蓐困苦萬分經西醫施治稍見功效神氣漸清惟左半體麻木動轉需人醫云性命暫可無虞偏廢終恐難免俄都水土寒濕萬不相宜若不赴別國調養難冀就痊等語刻下外部無應商要件已派參贊胡惟德代辦尋常公事可以接洽擬乞假數月俟飲食少進當早上火車赴德奧等國坐湯飲食藉以調

治井請旨飭桂使速來俾交卸內渡玉關生入得如龔使幸矣桂使去歲已經俄允接待當無異議如改派須先與俄商明爲妥 儒語言蹇澀較數日前稍好右手震動尙可勉強畫字謹飭參贊電陳乞代奏請旨遵行不勝迫切待命之至號

電慶邸李相 二月二十一日

巧悉叩感昨已將派代辦催新使乞假赴德奧就醫各節電請樞廷代奏桂使去歲已經俄允接待當無異議旨如垂問務祈玉成 儒病勢稍減左半仍難動轉醫云俄都水土寒溼若不赴別國調養難冀就痊乞垂憐是幸箇

電盛大臣 二月二十七日

俄官報登俄廷聲明東省議約旋又停商緣由譯稿多至三千言首敘東省肇事暨京津勦亂會議公約俄屢襄助中國情形末段始及正文略謂中俄連界各省之事審度情形可與公約同時分辦遂由武員與東省將軍議訂暫章歸復吏治又細思此次中國匪亂擾我邊民損我鐵路礙我利益遂分別逕向中國商議退兵杜患及保安地方暫時辦法不意轉招眾怒外國報謠傳紛紛並捏造保護滿洲約款其實此約乃交還滿洲之開章第一義也撤兵期限自應互訂辦法各國既因此約之故大與中國爲難俄廷雖欲撤兵不克速辦故滿洲全行交還一節應俟中國事定京都立定自主政府力量稍強保無後患方可再提至目下辦法俄廷仍不改屢次聲明宗旨以保安邊界而靜候事機等語全文鈔稿郵呈欽使號

電計已代奏奉旨乞示刻下病勢稍愈左體仍難動轉日內擬赴德國之  
威斯巴敦就醫請轉邸相代辦惟德稟沁



庚子年夏秋季與東三省將軍往來電報附鈔

電盛京增將軍（光緒二十六年）六月初一日

頃俄戶部面告中國現在滿洲一帶備兵似有占據鐵路之意工程員役避至牛莊人心驚惶都中匪噤方熾俄意在助勦不欲開衅若鐵路有急勢不得不調兵護守以保路工參歲旅順現均屯有重兵徵調甚速倘進據滿洲恐各國亦將進兵他省後患無窮特屬弟轉電尊處力保路工員役切勿動兵免開邊衅等語事關大局安危務乞加意希見復 儒東

電增將軍 六月初二日

現正與俄密籌排解倘滿洲開衅必致決裂萬望保護鐵路大局安危在此一著餘詳東電 儒冬

俄戶部電李中堂 六月初二日

譯維戶部電現因無從徑與本國駐使及貴國政府接洽辦事不得不請  
貴大臣垂念舊交逕飭滿洲東省鐵路沿途各地方官禁亂民毀壞鐵路  
傷害工役并照常幫助一切倘亂民或官兵毀壞鐵路傷害工役俄國勢  
必派兵保護人民及此數百萬金工程深信貴大臣必看重我兩人交情  
竭力設法保此浩工免啓中俄之隙此路係照約之事且係我兩人商訂  
者也維特押沃

李中堂來電 六月初五日

滿洲鐵路已諄電東三省將軍保護勿生枝節乞密致維吳鴻江西

黑龍江壽將軍來電 六月初九日

初六准李相轉到尊電內稱滿洲鐵路亟須保護等因俄人財力國家根本均視鐵路爲轉移尊諭最爲扼要弟未奉電之先已商茹總監工及伯利總督黑河武固畢爾那託爾力任保護囑勿來兵致搖民人反與路工不便茲又轉商盛京吉林矣現在拳民肇釁仇視外人做處稍覺安靜唯民情惶惑頗謂俄若來兵誓不甘心卽行拆毀鐵路弟已力爲彈壓倘照常工作兵不加多或可無事現在哈爾濱添兵不少黑河馬步兵聚集甚夥以爾古斯特列津各處屯兵數萬黑河一處並揚言西十三日假道愛琿來保鐵路似此情形俄兵一動路工萬不可保不惟兩國兵民同遭塗炭該國鐵路功敗垂成豈不大受虧累事關兩國大局乞速向外部力阻來兵鐵路有失唯三省將軍是問盼切禱切壽山陽

電壽將軍 六月初九日

陽電深佩偉略當卽轉外戶兩部據云東省鐵路俄並未添派一兵尊處所聞不確俄亦無兵丁調赴以爾古次克及特列津等處惟阿穆爾一省備兵以待發往旅順天津等處保護洋人財產別無他意俄深願與中國保守數百年邦交如東省將軍擔承保護鐵路俄決不派一兵前往等語現正與俄商議排解之策此舉關係緊要乞轉增長兩帥通力合作以維大局禱切盼切 備佳

李中堂來電 六月十二日

吉林長將軍佳電吉林鐵路當竭力保護惟現有長春轄境白龍驛華俄交戰一案因三段小監工利伯司基聽通事一面之詞帶俄兵到白龍驛

防營因要華民賭犯起衅意在尋鬪官兵閉門示讓俄官率眾越牆首先開鎗致斃華官一兵六受傷二情急還擊斃俄官一俄兵一受傷一經彼此派員查辦彼方一味狡賴又將華民要犯匿不交出以致各營勇忿氣不平現在再三開導雖未別生枝節但恐兵民蓄怨萬一團民煽惑必至一發難收電請貴大臣速向外部妥議電知茹格維志飭將案內要犯劉朮兩通事交案並將任性釀事不能持平了案之利伯司基伯羅新司基撤回從速了結庶兵民心服保護尙易爲力望速復鴻蒸

李中堂來電 六月十三日

黑龍江來電拳民仇教事東省迄無確音鐵路起止俄兵兩萬餘探聞附近庫倫之伊爾古及敵省交界各處約八九萬兵揚言自保鐵路並藉口

添兵爲我不能自主由海道入京平亂事後以兵力保全中國等語情殊難測奉省教堂鐵路間有焚毀拳民氣盛勢難阻遏已電俄廷奏該國勿庸添兵認保鐵路然恐不及現將新陳卅六營並添練十五營妥布嚴防惟有與將領竭誠籌措云鴻真酉

李中堂來電 六月十三日

頃接盛京將軍眞電奉天刻下義和團民數日忽有數千教堂鐵路公司全被燒毀所駐俄兵先遍搜拳民殺害鄉民並見我彈壓隊伍互相攻擊勢難猝解昨電令該總監工卽將俄兵撤回或可免衅未知伊肯聽否云看此情形殊爲焦急應如何挽救祈與維吳密商電示鴻文

壽將軍來電 六月十三日

來電敬遵轉商增長兩帥力認保護茲由增帥轉商長帥來電內開轉俄  
總監工茹格維志海蘭泡伯力現拳民四起焚燒教堂鐵路恐難相安而  
俄兵又遷怒附近鄉民搜殺幼童放火燒屋逢人卽殺結怨愈甚義憤積  
眾況拳民來去無定忽多忽少亦無准處斷非地方官所能彈壓且派隊  
彈壓而俄兵又往往猜疑致彼此互擊萬分棘手爲今之計只有敝界內  
所駐俄兵工役先行撤回以免舛端並可由敝處設法護送出境再四籌  
酌只好如此倘或派隊來護更恐於事無益矣卽乞電知等語查阿穆爾  
備兵固屬甚多以爾古且不具論卽斯特列津兵馬雲集夫人皆知何云  
無兵況俄督撫電稱若再來兵必嚴飭不准騷擾等語茲奉省業已如此  
拳民出沒無定兵丁多不知大體若不照增帥所議迅速施行必致互相

猜忌釀成事端乞再向外戶兩部商酌俄工役撤回加意護送所遺工程物料派員妥爲看守事定再來照常工作庶幾兩不致誤盼切壽山真

李中堂來電 六月十四日

頃吉林將軍電云江支電謹悉吉林鐵路早經飭屬並各軍竭力保護無如拳民遍地不論中俄一律毀壞道路綿長防不勝防深爲可慮現吉省東西兩路均尙無恙惟琿春界外及哈爾濱俄兵業已整隊意在進占果爾則岬自彼開非特鐵路難保勢必全局皆壞務請電致外部切勿來兵所有三省鐵路各省力任保護囑其放心云云三省旣力任保護鐵路乞轉商戶部勿再調兵致生疑岬仍電復鴻齊

電李中堂 六月十四日

蒸眞西文均悉又壽軍帥眞電稱伊與增帥意欲商撤界內俄兵并將工役護送出境所遺工程物料派員妥爲看守事定再辦等語當一并譯送維吳據稱東省拳匪已有蔓延之勢斷非撤回兵役即可保全且頃接急電盛京本處統領帶兵二千攻擊路工並聞增帥遇害刻下事無可爲惟有飛速進兵殊非得已云鐵路乃俄命脈所繫維吳前因東省力任保護故議定不派一兵原欲保路以保東省且保全局今鐵路告警大事已去將來三省恐非我有糜爛至此天意難回奈何長帥佳電所稱是半年前舊案現藉端索犯彼不置答正擬復間接齊電刻下情形大變無可挽救

儒冬

電壽將軍 六月十四日

真電遵商外部並再三勸諭據稱前因東省將軍力任保護鐵路故與貴大臣議定不添一兵乃現在拳匪四起業已擾及路工地方官不易彈壓斷非撤回兵役即可保全且頃接盛京警電知該處兵變攻毀鐵路增帥被害事已如此除飛速進兵保路兼助平亂竟無他法實非得已云鐵路乃俄之命脈故區區苦衷欲保路以保東省且以保中國大局現已無可挽救糜爛至此可爲痛哭確情尙望見示 儒寒

電 李中堂 六月十五日  
壽將軍

頃外戶兩部面告此次東省進兵實非得已專爲勦平亂匪決不與兵民爲難如各將軍肯合力助勦事平之後俄兵卽行撤回否則兵連禍結生民塗炭將來不知是何結局云請轉

三省將軍鈞處所聞如何函盼電復  
奉吉兩帥并盼復

備咸

上海道轉直藩電 六月十六日

初七軍機處交出國書一道囑電楊大臣欽遵轉遞大清國大皇帝問大俄國大皇帝好中國與貴國鄰邦接壤二百數十年來敦睦最先交誼最篤近因民教相仇亂民乘機肆擾各國致疑朝廷袒民嫉教貴國使臣格爾思曾向總理衙門請速勦亂民以解各國之疑而其時京城內外亂民蔓延已徧風聲煽播自兵民及王公府第同聲與洋教爲仇勢不兩立若操之太蹙既恐各使館保護不及激成大禍又恐各海口同時舉事益復不可收拾所以不能不躊躇審顧者以此乃各國水師不能相諒致有攻占大沽礮臺之事於是兵連禍結時局益形紛擾因思中外論交貴國之

與中國絕非尋常鄰誼可比前年曾授李鴻章爲全權專使立有密約載在盟府今中國爲時勢所迫幾致干犯眾怒排難解紛不得不惟貴國是賴爲此開誠布臆肫切致書惟望大皇帝設法籌維執牛耳以挽回時局並希惠示德音不勝激切翹企之至合照轉沉願

電上海道 六月十六日

願悉請轉廷方伯飛速遞呈軍機處欽奉國書譯交外部轉呈俄主得復卽電聞昨外戶兩部面告東三省已有拳匪攻毀鐵路不得已進兵保路兼助平亂決不與兵民爲難請飛飭東省將軍萬勿與俄生衅以維大局諸代奏 儒諫午

電壽將軍 六月十六日

頃奉初七電旨國書請俄主排解以挽時局東省亟宜合力平亂萬勿與俄肇衅致生枝節乞速轉奉吉兩帥 需諫

壽將軍來電 六月十七日

由密增帥電發後旋據呼倫貝爾報稱該處總管阿勒碩夫恃性橫行縱卒鎗傷華民五名一名立時殞命其四名亦命在旦夕當卽電知茹總監工趕緊查辦復據阿穆爾茹總監工電稱我國匪亂不能自治發兵代我掃除經此次盪平之後俄以全國兵力保我中國永遠完固不失尺寸等語鎗斃華民之案竟置不理又稱增帥之電係爲誣讒俄兵起見並愛璉哈爾濱等處均如此揚言此風一播人心共忿均稱俄國修路並無來兵保護之約去前兩歲來兵不少各處工段攜械游行迭次滋事均經前將

軍恩雨帥電達總署照會該國公使在案今乘我京津事起屢發重兵入境及至阻止更以代我平亂保我社稷爲詞試思卽有匪亂何須俄爲越俎代我平亂係何人邀請事後以全國兵力保我疆土係以何等待中國現在拳民遍布各處尋仇山屢嚴飭保獲幸得無恙今茹監工反謂增帥誣讒俄兵不思俄兵妄爲不自今始山固無法彈壓勢出萬難今又派員往哈爾濱及阿穆爾面與辯論速撤兵隊兩釋猜嫌禍在眉睫伏望速向外部力與剖辯痛陳利害否則釁端之開兩國塗炭山不能執其咎臨穎待命無任主臣壽山咸

壽將軍來電 六月十七日

寒電悉增帥遇害並無其事京津東省均無不可收拾亂匪業已次第盪

平昨商俄督撫及茹監工彼此各撤兵隊兩釋疑忌並派員面與省西七十里監工蓋爾襪甫晤商約伊進城允來無異乃十五夜該監工等不知被何人所惑聲言去有五百拳民竟自開鎗斃我華工無數焚毀所屋乘火車逃走該處原有護路華兵一營若有仇視之心當不至令其從容逃去今所遺土夫不下十萬深恐乘機鬧事現由營送來俄商一萬羅夫已飭素與該商交好之興發永安爲看待再有此等仍照此辦法決不傷害兩國盟好最爲敦睦今我京津有驚該督撫及監工人等不思開誠布公屢以大言恫喝今又乘夜潛逃人心大爲驚動山唯始終一詞力認保護彼若竟發兵來祇有盡力與戰而已山諫

電上海道轉直藩 六月十八日

照譯俄主復書俄國大皇帝與大清國光緒大皇帝友誼素敦關念中國最爲真切觀此友鄰之邦事機危急甚爲焦憂北京情形俄國使署人民暨他國使署人民存亡莫測深用爲大局慮刻下尙無從措辦惟俄國意旨始終如一當竭力幫助中國平定地方勦辦亂匪此等亂匪初與天下各國爲難現已蔓延滿洲與貴專使李鴻章訂定密約大相違背如此情形向各國設法調處實難啓口如大皇帝政權自操設法先將各國旅居貴國人民照約保護一面勦平亂匪朕深願竭力幫助大皇帝挽回時局不令貴國生靈塗炭是爲至盼云外部稱俄主一意敦睦但須在京各使無恙滿洲鐵路保全方有詞向各國排解現各使情形務乞示知等語仍請電諭東三省將軍力保鐵路勿與俄開衅是爲至要請代奏 儒嘯

電壽將軍 六月十八日

咸諫悉增帥健在謠傳可恨貴境嚴飭保護地方安謐佩慰俄監工妄言生事誠堪痛恨已諄向外戶兩部言之此間君臣均極顧全邦交柰在彼辦事之人不明大體致生猜疑昨電傳國書請俄排難解紛俄主復電只要各國公使無恙東省鐵路保全伊必竭力幫助挽回時局果克如此國事大有轉機務望堅忍維持厥功甚偉素仰盡籌敢盡忠告幸希採納請轉增長兩帥 備囑

壽將軍來電 六月十九日

中俄交好山因不肯發難故力任保護彈壓土夫今阿穆爾又發兵多名頃據西路統領報稱十五戌刻俄總管敖渾別拉面稱茹格維志函調趕

緊回國糧物工程切勿戀戀該總管仍求點交看守旋有土夫多人攔阻索錢幾釀事端幸兵隊壓服業將該總管及營官兵丁眷屬人等派兵保送出境所遺各物俟查明再報等情當飭妥爲保護所遺物件逐一登記看守不准遺漏惟思前商撤工不允繼商撤隊不允而蓋爾襪甫夤夜縱火開鎗毀電焚橋以至土工乘機變故百出若均如敖渾別拉明告而去護送出境豈不所全甚多今該國兵隊日增我國土夫愈忿已三次電告阿穆爾如俄輪再行南駛我卽開礮轟擊矣幸卽轉達外戶兩部爲禱壽山敬

壽將軍來電 六月十九日

亥密蓋爾襪甫逃後沿途毀我電線當由六百里飛飭各隊如遇該監工

立即放行不准畱難茲據東路統領報稱該監工率男婦六七百名兵卅車頭三個行囊八十餘輛行至對青山車站又割斷電線二百餘丈放火焚燒房屋綁去華童一名所存糧石拋棄滿地職等奉令保護不知俄人是何情理未敢妄動只得聽其出境等語查蓋監工等現住哈爾濱已電知吉林長帥一體妥爲保護並派員前往開導不必再有輕動致生枝節唯該國不得再行派兵入境合亟電聞壽山巧

吉林長將軍來電 六月十九日

宙京信阻諭旨主戰宣言中外而俄之敗盟與否無確信閣下覘彼舉動如何乞明示順巧

電吉林長將軍 六月十九日

巧電悉弟十六奉電傳國書以此次幾干眾怒請俄主排難解紛俄主復電稱俄始終顧重鄰邦深願助力惟須都中各使無恙滿洲鐵路保全方可有詞向各國排解等語鐵路乃俄之命脈所繫前壽眉帥陽電稱如俄不進兵東省路工準認力保彼欣然允定不派一兵兩無猜忌嗣忽得盛京警電拳匪已毀及鐵路官兵勢難彈壓事已至此彼遂不顧嫌疑并弟之力阻亦置不聽聞已速飭進兵保路兼助平亂我軍若不開衅決不與兵民爲難弟曾發佳威諫嘯電備述詳細請眉帥轉尊處諒均入鑒刻下情形仍盼續示 儒效

李中堂來電 六月二十日

寒電及吳克密電均由保定轉樞譯請旨分飭該將軍等設法挽回俄添

兵僅爲護路勦匪計尙不至礙全局若因得利圖三省英日必起而相爭亦非俄之利吳電擬用大力平亂求我維持免流血之慘似用意尙有分寸伊卽起程果從何路如走北路通信甚難乞詳詢電示初七旨催迅速來京未言何事似由維特前電而發倘俄將決裂去有何益擬月內至滬再酌進止京內使館漸穩鴻篠辰

電盛京將軍 六月十九日

東冬兩電未奉復示嗣由壽眉帥轉佳咸諫嘯四電想入鑒國書請俄主排解彼答稱極願效力但須都中各使無恙滿洲鐵路保全方易向各國啓口等語彼聞拳匪已擾奉天鐵路官兵勢難彈壓致有派兵之舉聲明專護路工助平亂匪如不與開衅決不與我兵民爲難蓋慮周詳當必仰

體朝旨維持大局刻下情形若何乞示復 儒效

壽將軍來電 六日二十日

屢電俄督撫囑勿再行發兵南下竟不回信十七輪船七隻拖帶十一隻滿載兵馬鎗礮山念崧勿妄開飭愛放行復電俄撫以後如再發兵卽行轟擊乃該撫仍置不理今日未刻他復發兵輪一隻拖船五隻經後路統領盤查上載軍火等件續經廓米薩爾船到卽向我開礮我軍當已回擊而該廓旋卽逃去是直與我開釁矣山爲國守土何能再事遷就現告俄督撫彼如照舊來兵山當照舊轟擊也西路俄國官兵眷口人等護送尙在中途務使平安出境省中又獲二名亦飭撫養幸釋錦念山皓

電壽將軍 六月二十日

霞巧皓電遵詰外戶兩部伊甚不謂然但云俄因匪已擾及東省鐵路始不得已派兵專爲保路起見決不與地方爲難已聲明在前若貴將軍定欲轟擊實屬誤會有礙大局又稱愛琿某統領派兵攻擊布拉廓威臣斯克城是欲激成戰事幸速電阻等語鄙意朝廷既請俄排解亟應仰體此意萬勿畔自我開乞卓裁餘詳咸諫嘯電不贅 儒芻

電李中堂 六月二十二日

東省各將軍 儒既告以國書暨俄主復電深盼保全東省鐵路并切囑堅定勿生枝節而壽將軍來電輒稱如俄兵來定將轟擊今據吳克稱布拉廓威臣斯克已由愛琿統領派兵攻擊彼並無意開釁我先越境尋仇實堪駭異又長將軍電有諭旨主戰之語豈矯詔已到東省 儒急電戒勿輕

動致損事機而激變局不知肯見聽否乞速電力阻爲要養

壽將軍來電 六月二十九日

俄國工役人等在我國屬界者現均盡力護送西路數名業已平安出境  
卽哈爾濱一處男婦老弱尤多拳民兵勇士夫無不忿恨急欲一逞山因  
念兩國雖有戰事不妨彼此對敵至商民老幼何辜不忍多戕生靈是以  
嚴飭各隊並開導義和拳民不准渡江妄殺妄燒致乖上天好生之德邇  
計開仗已久省城之維持保護固不待言而哈爾濱仍存畱無恙豈非明  
證現在拳民兵勇嘖有煩言謂山袒護俄國抑勒兵民而俄國乃將我華  
民及江左各屯人屠戮不堪並逼迫入江是何殘忍至此查此次開仗實  
因我國人人共忿決非朝廷及山所能彈壓現在拳民嚮集如此激怒俄

城伯力等處定遭焚毀奉天教堂公司之灾哈爾濱以西雷火抓毀鐵路均非人力所爲幸向外部再議轉飭各隊努力對敵勿再妄殺良民哈爾濱男婦如願回國速卽起程已嚴飭各隊並電商吉林該處輪船如載人下駛決不轟擊以全人命立候電示山宥

電壽將軍 六月二十九日

宥電悉廿一明發上諭通飭各直省保護各國人民勦辦土匪亂民以靖亂源想已奉到務望欽遵勿誤大局 儒豔

電李中堂 七月十三日

外戶部云東三省華兵不但不合力彈壓亂匪保護鐵路仍向俄兵攻擊不休友好之邦豈應若此請貴國家速諭該將軍等卽日停兵免損鄰好

其詞氣雖厲似覺少有轉機乞轉奏從速照辦以免兵禍大局幸甚 儒元

電李中堂 七月二十一日

維致公電譯下貴大皇帝應嚴飭東省各將軍停工保路俄兵並派曉事

全權大臣馳往將違旨肇亂各官嚴查懲辦乞復云馬

校者註·停工二字似停攻之僞

李中堂來電 七月二十三日

東撫電開頃奉軍機處咨開十九日奉旨李鴻章電悉據楊儒元電所稱似俄亦有停戰之意自可先從俄國辦起惟奉天之蓋平熊岳吉林之三姓琿春黑龍江之愛琿現已均爲俄據如俄實願先行停戰並許勸阻各國則東三省被據各處先當有說以處此著李鴻章穩慎通籌如果確有把握自當諭飭增祺等一體停兵也將此電諭李鴻章知之欽此三省俄

據地方是否意欲久據抑俟彼此商議保護鐵路即可退兵希與外戶部  
妥籌商定以憑覆奏鴻箇

電李中堂 七月二十四日

箇電譯交外戶部據稱俄始終願保和局若東省鐵路無警本允不派一  
兵嗣因諸將軍自認不能彈壓俄始派兵曾聲明專爲保路助勤不與兵  
民爲難孰意東省不自勦匪反與我尋釁首先越界轟我邊城至有今日  
誰執其咎貴政府於勦匪弭釁保路保使各節至今無一施行刻須略審  
事情再定辦法稍遲奉復等語彼因目下滿路與格使并聯合軍到京情  
形未得確電故不肯卽復 儒詰之再四始稱俄決無據東省意可請放心  
云敬

徐星使轉吉林長將軍來電 七月二十七日

效電悉前四電未到戰事亟綫斷未覆前茹總監工來函意在保鐵路修舊好又見貴處致李傅相電俄因平亂進兵現奉吉亂民均勦滅江省本無亂既自平無煩彼力若銳進兵是擾民占城現請轉商外戶兩部撤隊退城仍歸舊好三省鐵路由我力保庶免兵連禍結各國生心彼亦何益如何速復順有

電徐星使轉長將軍 七月二十七日

江省轉去四電竟未達覽深可詫異有電遵商外戶部據稱早信我言會同保路平亂何至成此局面刻下尙有何說云仍望力保鐵路勿攻俄兵或可補救萬一否則將來議和時彼更有辭歸咎恃愛密陳 儒沁

李中堂來電 七月二十九日

請覆維特東三省消息甚惡由於我政府力難兼顧應奏請將違旨肇亂各官嚴查懲辦望貴國停兵勿進共保和局餘俟吳克到商辦等語請速譯送鴻勳

電李中堂 七月二十九日

勸悉外部文略稱現中俄交誼未稍損惟停戰須互商各國辦理俄兵占東省各城非俟地方平靖保無後患未便退兵邊界禍根咎在兵丁亂民望速遷撤等語 儒豔

李中堂來電 八月初二日

敬電頃始到東省縱兵尋衅聞由江省之壽山奉省之晉昌發難鴻於廿

三電奏請派員查辦惜未得達除已陷數城外據報營口海城遼陽均不守俄稱無據東省意似未盡確各國必將藉辭效尤大局殊不可問果有法維持否鴻卅

徐星使轉盛京增將軍 八月初五日

承電示均因阻隔頃由直藩轉到傳相述尊電敬悉關切大局無任感佩拳民仇教波及俄鐵路以致啓衅殊非意料所及現拳匪已驅逐淨盡中俄向係敦睦未可以小嫌相持已就近照會旅順提督以現在駐兵之處爲限各不相侵擾希轉致俄外戶兩部先停戰事以免生靈塗炭且鐵路原爲商務而設若使人民流離於商務有礙況鐵路未大傷損尙易補修倘地方凋敝培養生息非一時可復也頃接吉江兩省來電亦均照會俄

官暨議停戰貴大臣垂念時艱特請分神妥議並祈示復爲盼增祺等豔

電東省三將軍 八月初七日

豔電遵商外戶部極力勸解彼稱初因三省力保鐵路俄已允不派兵嗣因江省自認無力彈壓始不得已派兵聲明保路助勤不與地方爲難孰意江省不自平亂反先開礮尋衅越境來攻我何能任彼礮轟按兵不動且將軍行文聲言開戰棄好尋仇致有今日豈我之咎哉如欲停兵須先繳軍器以示不再攻擊方可商議云此事自五月以來弟曾三次巡電增帥兩次巡電長帥而復壽帥託轉之電不下十數次無非苦口諄勸勿輕啟衅原以維大局遵朝旨而顧寅誼也柰各電雖發而未轉到或雖到而未照行增帥並無一復長帥電稱均未得達致弟迭次電勸之言盡同河

漢屢受外部詰責而諸公用兵並未應手得無憤懣刻下俄已允撤北京之兵以示交好尊處如就近向總監工暨俄統帶設法轉圜或冀補救萬一否則恐彼異日歸咎有辭耳辱承下問敢布腹心 備虞

李中堂來電 八月十二日

頃接佳電乞轉告外部謝撤兵回津並徧告各國政府美意昨已將歌電及戶部豔電全鈔馳奏東省違旨肇衅之將軍壽山副都統晉昌已奏參斥革治罪不敢空言塞責並告戶部爲要鴻真申

電李中堂 八月十三日

眞電遵謝外部據稱俄兵卽日出京各國從違未決伊決不食言壽晉嚴參治罪深佩魄力維赴巴黎電到伊必欣慰 備覃

不佞移軫朔漠，倏已四年。慨時局之逾，藉憤強鄰之偪，處尙幸官紳水乳，藉聯絡爲維持。去歲北方事起，宗社阽危，始而商撤京兵，繼而勸歸侵地。人祇視俄廷之輯睦，而不知當局之苦心。當東省未亂之先，俄請代保鐵路，允我不派一兵，曾經力阻。各將軍不可妄開兵釁，日恆數電，電輒數百言。乃壽山任性，晉昌把持不聽良言，以至糜爛不可收拾。迨奉商議全權，早料事必棘手。數月以來，婉切爭持，剛柔互用，費盡唇舌。居然將約稿刪改過半，視原議判然殊觀。自中外訂約以來，所未曾有況得之用兵之後，卽徵諸各國史冊，亦未之前聞。緣俄亟欲撤去大軍，以節餽需，故肯遷就。亦緣彼欲就我商議，鑒余誠悃，極力通融。柰旁觀者不明外交之政策，不審國勢之強弱，不察利害之重輕。紙上空談，頭頭是道。按之實事，隔膜殊多。中國辦事之人，向爲集矢之的。此風不自今日始矣。夫此約原不敢謂

一無流弊然與其永據勢成致各國接踵效尤終歸分裂何若小損權利俾國家發祥之地已失復還此中機括惟合肥相國見之最眞爭之最力一二東南柱石尙未免受人簧鼓坐昧事機來電致謂縱激怒於俄不過不還東三省抑思龍興故土陪都所在陵寢所存斷無永棄之理異日再議收復試問俄果遂拱手交還乎抑仍須訂立條約乎恐小之爲俄加償兵費而改款終難大之爲俄增廣幅員而禍機更亟是則各國之所以愛助中國與諸公之所以報效朝廷者亦從可知已觀於俄廷布告舉重若輕而觀釁而動待價而沽亦已意在言外不佞病入膏肓行將就木恐第見郵田之奪而不及見趙璧之歸矣吁可悲也夫光緒辛丑三月旣望迤

盒自識



卅六年三月二日

#6

469221